



Ol nupela sumatin insait long MLT -Pes 9



SEKIM GUT: Lourie Oki, Junia Botenis bilong NAQIA i sekim nupela rais fam long ol binatang. Lourie wantaim ol wanwok i bin go long Gabadi long Sentral Provins taim ol fam lain i laik havestim ol haibrid rais long dispela wik Mande. **Lukim stori long pes 21.**
Poto: Nicky Bernard.

Pes 3: Kredit skim bai helpim Wewak taun lain

Pes 4: Ovasis tim bai helpim Bogenvil ileksen

Pes 8: PINA amamas long nupela PNG Media Kaunsel

Pes 23: SIME tekova long NBPOL

Sekim akaun bilong Is Sepik : Maru

WOK painim bai kamap long Is Sepik provinsal gavman long rot provinsal gavman i yusim pablik mani long planti yia kam inap nau.

Minista bilong Tred, Komes na Industri na memba bilong Yangoru Saussia, Richard Maru i tok wok painim bai kamap long Is Sepik provinsal gavman bikos pasin korapsen i anatp moa long provins long planti yia na planti milien kina i lus nating long nem bilong ol giaman kontrak.

Minista Maru i mekim dispela tok long asde bihain long Bot siamen bilong Boram Haus sik Allan Bird i tokaut olsem K1.2 milien bilong Haus sik i lus long giaman kontrakta.

Mista Bird i tok O'Neill gavman givim K2 milien long wokim mentenens wok long haus sik na bot i tok orait long yusim hap mani long baim x ray masin. Tasol Is Sepik provinsal gavman i baim K1.2 milien i go long wanpela kontrakta tasol i no gat wok i kamap.

Long wanpela pas Ekting Sif Eksektiv Opisa bilong Boram Haus sik, Mark Maulundu i rait i go long Ekting Provinsal Edministreta bilong ESP i tok insait long mun Desember 2014 provinsal gavman i komitim K1.2 milien na baim long tupela kontrakta.

Long prinaut bilong PGAS o PNG Gavman Akaunting Sistem, Mista Mauludu i kisim long provinsal treasuri opis i soim olsem Pins Construction Limited i kisim tupela sek, wanpela long K723,174.65 na

narapela long K304,124.40 long nem bilong stretim toilet bilong haus sik.

Na tupela sek long K33,791.60 na K80,352.74 i go long Intenel Revenu Komisn IRC olsem gavman takis

Mista Bird i tok em i wok bilong kontrakta long baim takis long IRC na i no provinsal gavman. Dispela i soim olsem giaman kontrakta i kisim nating pablik mani.

Mista Bird i tok bot bilong haus sik i gat pawa long givim kontrak

long mani mak bilong K500,000. Mani antap long dispela bai go long tenda bot. Tasol dispela i no kamap.

Mista Mauludu long pas bilong em i tok rot mani i go aut long Desember long klostu long taim bilong pablik akaun i pas, i no stret na tu i no gat wanpela wok i kamap long Boram haus sik.

Minista Maru na Misa Bird i tok dispela em bikpela stil pasin.

I go moa long pes 2...

3 TIMES A WEEK*
between **PORT MORESBY & HONG KONG**
More connections to Asia & Europe

book now!

Air Niugini
www.airniugini.com.pg
EXCLUSIVE CARRIER FOR THE 2015 PACIFIC GAMES

*3rd weekly service commencing 30th March 2015.
Call Toll Free on **180 3444** or contact your nearest Air Niugini Travel Centre or Travel Agent for further details.

PORT MORESBY 2015 XV PACIFIC GAMES

I kam long pes 1...

Sekim akaun bilong Is Sepik

Mista Maru i bin miting wantaim Praim Minista Peter O'Neill na i tok Mista O'Neill i givim tok orait long wok painim bai kamap long EPG long dispela K1.2 milien na tu long rot EPG i yusim mani bilong provins long ol yia bipo.

Mista Maru na Allan Bird i tok bikpela korapsen i stap long EPG longpela taim. Tupela i tok Boram ripot stap pinis long polis frod skwad bai mekim wokpainimaut long dispela.

Mista Maru i tok gavman i tokaut long bikpela milien long baset na mekim polisi bilong developmen tasol i no sainim sek. Em i wok bilong ol pablik sevan. Tasol ol sampela pablik sevan i korap na i wok long stilim mani.

Em i tok bikpela mekim save i mas kamap long husat pablik sevan i wok bung wantaim ol giaman kontrakta long stilim mani bilong gavman.

Mista Bird i tok Is Sepik provins i no gat kontrol bilong ol pablik sevan bilong en. Ol pablik sevan i wok long laik na korapsen i stap longpela taim yet na dispela K1.2milien i lus em i wanpela bilong planti korap pasin long provins.

Ol nupela pasto i kisim salens

Paulus Tali i raitim

HET Bisop bilong Evanjelikel Luteran Sios bilong Papua Niugini, Reveren Giegere Weng, i bin stap insait log greduesen bilong Luteran Hailans Semineri long Ogelbeng long Hagen Distrik.

Moa long 22 pasto i bin greduet we kamap bilong Het Bisop Wenge i givim moa amamas long ol Kristen manmeri na ol pasto husat i bin greduet.

Dispela taim i lukim ol yangpela bilong Sol Nomane i singsing long stail bilas bilong ol na winim mambu long welkamim Het Bisop na Prinsipel bilong semineri, Reveren Umba Bomai na foma Helpim Bisop, Reveren Kiage Mотор, na ol tisa bilong semineri, na ol komyniti lida long Ogelbeng yet.

Bisop Wenge i bin tokim ol pasto olsem, "Yupela i kam skul long hia em i no asua.

Em i bikpela samting long yupela i kamap wokman bilong God long go aut na autim Gutnius bilong bikpela Jisas long strongim bilip bilong ol manmeri husat i hangere long Tok bilong God.

"Maski yu yangpela, tasol yu bihanim singaut bilong God long kamap olsem wokboi namel long ol man meri long peris, seket na kongrige-



Ol yut bilong Sol Nomane i pulim mambu na kisim Het Bisop na lain i go insait long sios. **Poto: Paulus Tali**

sen bai yu go long em.

"Nau yupela i pinisim 5-pela yia long semineri. Em i no isipela wok long taim na komitmen bilong yupela long save yu gat long em taim yu stap long semineri.

"Mi olsem het bilong sios bilong Luteran i laik tenkyu long ol tisa long taim na komitmen na save yupela i givim long lainim ol nupela wokman.

"God em luksave long ol kain yangpela long go mekim wok misin tru na karim wok Gutnius long maunten, bus na nambis.

"Ol manmeri i hangere long tok bilong God. Yupela i go na lukim pen na hevi," Bisop Wenge i bin tok.

Bisop Wenge i bin skruim tok i go moa long ol nupela pasto greduen.

"Taim yupela i go autim Gutnius long ol manmeri, no ken tingt-

ing tumas long mani na ol kago samting bilong graun.

"Go olsem ol wokman bilong bikpela Jisas na bringim ol sipsip i kam long banis bilong bikpela na bai yu inap lukim moa blesing bilong bikpela Jisas long laik bilong yupela namel long ol man meri.

"Mi amamas olsem yupela sampela i go wantaim meri na pikinini we em bai inap strongim wok ministri bilong yu taim yu go long fil.

"Yu go na sevim ol arapela husat i sot long tok bilong God.

"Long taim yu laik autim Gutnius, oltaim long wok bilong yu, tingim prea long bikpela pastaim na bihanim yu autim Tok bilong Bikpela bai yu inap lukim strong bilong bikpela Jisas long wok ministri bilong yu," Bisop Wenge i bin tokim ol.

Prinsipal bilong Ogelbeng Semineri, Reveren Umba Bomai i bin makim ol tisa na tok amamas long kamap bilong het bisop long greduesen seremoni.

Em i bin tok Tok bilong God tasol inap strongim ol treni pasto nau ol greduet long go na mekim wok Gutnius namel long ol manmeri bilong God.

Em i bin autim bikpela tok tenkyu i go long ol tisa long hat wok ol i bin mekim olsem em i no wara nating, tasol God i luksave.



Dipatmen bilong Tred, Komes na Industri

Opis bilong Seketeri

PABLIK TOKSAVE

Dispela tok save i go long olgeta papagraun bilong ol wan wan PDL eria olsem Stanley Gas Condensate Projek (PDL 10) we Mista David Ganaii, Ekting Fes Asisten Seketeri bilong Komes Divisen tasol i stap olsem opisal maus man long Dipatmen bilong Tred, Komes na Industri (DTCI) long toktok wantaim ol papa graun long olgeta wok developmen olsem Bisnis Developmen Gren (BDGs) bilong Oil na Gas Projek.

Tok lukaut i go long ol papagraun bilong ol PDL eria olsem ol i no ken toktok wantaim ol narapela woklain. Ol i mas toktok wantaim Mista David Ganaii tasol aninit long Opis bilong Seketeri. Dipatmen bilong Tred, Komes na Industri bai i no inap long bihanim wanem kain tok promis ol narapela opisa i mekim. Olgeta toktok bilong ol bisnis developmen olsem ol BDG i mas kam long opis bilong Mista Ganaii.

Sapos mipela i painim wanpela, narapela opisa i wok long giamanim ol papagraun na i wok long kisim mani long ol, em mipela bai sasim em na pinisim em long wok bilong Pablik Sevis.

Sapos ol papagraun i lukim kain pasin i kamap, ol i mas toksave hariap long Opis bilong Seketeri long telepon namba 3259225 o salim email long: edairi@dc.gov.pg. Tok orait i kam long:

JOHN ANDRIAS
Seketeri
24 Februari, 2015

Sevenpla i dai long PNG hailans long bikpela ren

I kam long ABC

SEVENPELA pipel i dai pinis long Hailans rijon bihanim ol bikpela ren we i kamapim ol tait wara.

Praim Minista, Peter O'Neill, bai go lukluk long hevi bikpela ren i bin kamapim long hailans.

Pius Kari, disasta opisa long Maun Hagen long Westen Hailans i tok wanpela meri na 6-pela pikinini i bin dai taim ol taitwara i bin wasim ol i go long ol bikpela wara long Jiwaka provins long wik i go pinis.

Ol dispela bikpela ren i wok long

bagarapim tu planti hap bilong Hailans Haiwe na stopim ol kar i go kam long Hailans rijon, na ol provins long nambis olsem Morobe na Madang.

Westen Hailans provins na Jiwaka provins i kisim bikpela bagarap tru.

Opis bilong disasta long Westen Hailans i tok ol i salim pinis ripot bilong ol i go long Nesenel Disasta opis na nau ol i wet tasol i stap.

Praim Minista, Peter O'Neill, bai go lukluk long hevi bikpela ren i bin kamapim long Hailans rijon.

MCPNG i gat eksekyutiv

PAPUA Niugini Midia Kaunsel (MCPNG) i tok aut long ol nupela eksekyutiv long go pas long dispela ogenais-esen.

Long las wik Fraide, ol memba bilong MCPNG i bin holim miting bilong ol we i save kamap olgeta yia, long Insitut bilong Nesenel Afeas (INA) long Pot Mosbi. Laspela tok tok bilong ol em long makim nupela eksekyutiv long MCPNG.

Post Courier, Nesenel Brodcasting Komisin (NBC), EMTV, FM 100, PNGFM, Wantok na ol memba bilong Midia Patna na CIS midia i bin stap long bung. Sunday Chronicle i no bin go na ol i tok sori.

Edita bilong Post Courier, Alexander Rheeney i kamap presiden, Janet Kwalahu bilong NBC i kamap vais Presiden, Andrian Au bilong PNGFM i kamap tresera na Frieda Kana bilong Wantok i kamap seketeri.

Dispela kaunsel i no gat planti memba taim ol sponsa i lusim ol olsem tupela yia i go pinis long wanem ol olpela eksekyutiv i bin kaikai mani. Tasol tupela tim bilong painim aut i painim olsem dispela i no tru na ol i tok ol mas lukautim gut mani.

Ol memba bilong MCPNG i laik kisim bek wok bilong ol olsem maus lain bilong midia indastri na wok wantaim ol sponsa long mekim gut stendet bilong jenelis.

Nupela presiden, Alexander Rheeney i tok tenku long ol memba long bilip long em na makim em kamap presiden.

Em i tok moa olsem i gat planti wok long mekim na ol PNG na ol midia indastri bai bilip gen long dispela kaunsel.

"Mipela i mas long wok wantaim na kisim bek kaunsel na long toktok wantaim ol memba yet. Midia i senis na i moa-beta yumi bihainim dispela senis," Mista Rheeney i tok.

Wewak taun meya kamapim kredit fesiliti skim long helpim pipel

OL pipel bilong Wewak Eben Lokol-Levol Gavman (WELLG), husat i gat tingting na plen long kirapim ol liklik infomol bisnis ektiviti long helpim ol yet nau i ken amamas na tok tenkyu long Wewak Taun Meya, Charles Malenki.

Taun Meya Malenki i kamapim wanpela kredit fesiliti skim long helpim na sapotim ol pipel bilong WELLG.

WELLG i gat 16 kaunsil wod.

Meya Malenki i tok em i kamapim dispela kredit fesiliti skim bikos planti pipel i save go long opis bilong em na askim long fainensel helpim long baim skul fi. Meya Malenki i tok bikos opis bilong em na tu, i no gat mani o baset bilong givim fainensal helpim long skul fi, em i save yusim mani bilong em yet long helpim ol pipel.

Em i tok em i kamapim kredit fesiliti skim long helpim ol pipel bilong em long kisim dinau o lon long kirapim ol liklik infomol bisnis long helpim ol yet.

Em i tok mani we gavman i save givim long WELLG long karim aut wok bilong en i liklik tumas. Dispela i mekim hat long ol.

lokol-levol gavman bilong em long givim aut skul fi fainensal helpim long ol pipel.

Fainens na eksekyutiv komiti bilong WELLG i oraitim pinis sabmisen bilong Meya Malenki na putim mani mak long K50,000 long kamapim dispela kredit fesiliti skim.

Dispela mani we WELLG bai baim i go long Nesenel Developmen Benk long Wewak na Wewak Developmen Benk bai menesim dispela kredit fesiliti skim.

Malenki i tok em i askim sinia projek opisa long Divisen bilong Komes na Indastri, Gethrude Karu, long Is Sepik Provinsal Edministresen nae m redim ol pepawok na polisi gaidlain bilong dispela kredit fesiliti skim.

Em i tok bihain long Misis Karu i ronim wanpela kos bilong dispela kredit fesiliti skim bilong em bai lonsim dispela kredit fesiliti skim.

Malenki i askim ol pipel bilong em long yusim dispela kredit fesiliti skim long kisim dinau na kirapim ol liklik infomol bisnis wok long helpim ol yet na tu long stretim sindaun bilong ol.



Ol nupela het lain bilong MCPNG.

hankais Frieda Kana (seketeri), Alexander Rheeney (presiden), Janet Kwalahu (vais presiden) na Andrian Au (tresera).

Helping PNG and the South Pacific

grow!

BRANCHES

AGENTS

EFTPoS

ATMs

MOBILE

Bank South Pacific (BSP) is the regional leader in banking and financial services. Since 2010, we have grown our network so all customers have convenient and affordable banking access - anywhere, anytime.

We offer state of the art electronic banking solutions via Mobile and Internet Banking. Our network of Branches, Agents, EFTPoS and ATMs is the largest across PNG, Fiji and the Solomon Islands.

BSP's strategy combines innovation, with market leading products and services, supported by professional and passionate people, ready to help you grow your business or personal finance.

We are helping the Pacific Grow. **GROW WITH BSP.**

	2010	2015
BRANCHES	68	111
AGENTS	86	287
ATMS	270	432
EFTPoS	3,275	11,882
MOBILE BANKING*	K3million+	K36million+
CUSTOMERS	843,468	1.47million+
GROUP NPAT	K286million	K507million (2014)

*Number of transactions (2014)

Photo: BSP's Flagship Branch in Port Moresby. Harbour City Branch, BSP Haus.

www.bsp.com.pg

MiBank Wod Empawamen Strateji Model kamap long Gumine

NATIONWIDE Microbank i amamas long patna wantaim memba bilong Gumine na Minista bilong Edukesen, Nick Kuman long mekim wok bilong Wod Empawamen Strateji long Gumine Distrik insait long Simbu Provins.

Aninit long Wod Empawamen Strateji Model, Minista bai givim mani bilong 45 Wod bilong Gumine Distrik aninit long Distrik Straksa Impruvmen Program (DSIP).

Ol dispela mani em bilong mekim ol wok bisnis olsem Tred Stua o groim na salim ol kumu o lukautim ol enimal laipstok.

Minista Kuman i tok em i luksave pinis olsem ol dispela kain wok bisnis i stap pinis long ol plen bilong ol Wod wantaim helpim bilong Gumine Distrik Menesmen Tim.

Long helpim dispela wok bilong Wod Empawamen Strateji, MiBank i opim ol Wod Akaun bilong 45 Wod in-



Minista Kuman i sainim pepa bilong woka patna wantaim MiBank long dispela wik.

sait long Gumine Distrik wantaim signesa bilong ol Wod Kaunsil na ol Wod Komiti i makim olgeta hap bilong komyuniti olsem bisnis, sios na ol meri grup.

Ol mani bilong Gumine Distrik bai i go insait long wan wan Wod akaun na ol yet bai rausim long mani mak bilong ol projek taim ol i redi.

MiBank bai helpim Gumine Distrik Menesmen Tim long lukluk na bihainim gut wok bilong ol wan wan Wod Projek na ol bai kisim ripot bilong ol benk akaun bilong ol tu.

MiBan bai givim Fainensel Literesi na edukesen trening long ol Wod Komiti long ol i ken save moa long we bilong lukautim gut mani bilong bis-

nis bilong ol.

"Fainenesol Literesi na edukesen em wanpela bikpela wok bilong MiBank. Na mipela i laik givim moa trening i go long ol wod memba na ol pipel long Gumine na i go moa long Simbu Provins," Mista Tony Westaway, Menesing Dairekta bilong MiBank i tok.

Woka kompensesen kleim nau i stap long kompiuta

MINISTA bilong Leba na Industriyel Rilesen, Benjamin Poponawa, Memba bilong Tambul-Nebilyer bai opim Opis bilong Woka Kompensesen Kleim Prosesing na Peimen Sistem (CPPS) tomoro long Crown Plaza Hotel, long Pot Mosbi.

As tingting bilong opiim CPPS em long tokaut long pablik olsem ol kompensesen kleim bilong ol wokman na pemen sistem bilong nau bai kamap long kompiuta.

Pastaim olgeta kompensesen kleim em ol woklain bilong Woka Kompensesen i save redim long han tasol na ol pepa na ol woklain husat i kisim bagarap na ol famili bilong ol lain husat i dai, i save wet longpela taim long kisim kleim bilong ol.

Nau Opis bilong Woka Kompensesen, ol i kamapim wanpela Statutri Opis aninit long Ministri bilong Leba na Industri Rilesesens i kamap wantaim wanpela Projek wantaim nem, "Kleim Prosesing na Peimen Sistem" long 2013/14 long senisim dispela sistem long han i go long kompiuta sistem.

Dispela kompiuta sistem bai helpim ol menesmen na administresen bilong Opis

bilong woka kompensesen kleim na tu long ol Employoya, Insurens na Medikal Bot olsem ol i save wok wantaim long wok bilong komensesen kleim.

Nau olgeta dispela lain i ken kisim ol ripot na tok save long kompiuta na internet na e-mail. Dispela i min olsem olgeta kleim registresen, wok bilong en na peimen nau bai i ken kamap long e-mail na internet.

Bihain long Mas 6, 2015 ol kampani na ol wokman, wokmeri husat i kisim bagarap o lain bilong ol i dai, bai wokim olgeta kleim i mas yusim internet o e-mail long mekim. Ol lain long ol ruel eria bai wok wantaim ol kampani bilong ol long putim ol kleim bilong ol.

Ol Kampani we i rejista wantaim IPAi ken rejista wantaim woka kompensesen CPPS onlain. Sapos kampani bilong yu i rejista pinis log sistem bai OWC i givim yu wanpela paswod na username. Tasol sapos em i namba wan taim bilong yu rejista, yu ken go long employoya rejista pes na raitim wanpela username olsem wanpela email adres na paswod.

Wanem taim bai ol pipel bilong Motu-Koitabu kisim jastis? Michael Malabag....

Frieda Sila Kana i raitim

MEMBA bilong Pot Mosbi Notwes na Minista bilong Helt, HIV na AIDs, Michael Malabag i bin tokaut long bel kraik bilong ol pipel bilong Tatana wantaim Hanuabada long lukim gavman i mekim stretpela pasin long kotim na mekim save long ol polisman husat i bin kilim nating tripela man asples long mun Februeri.

Minista Malabag i bin askim long taim Palamen i bin sindaun i no longtaim i go pinis long wok painimaut bilong ol polis long husat tru i sutim i dai ol tripela man na bilong wanem as.

Em i tok 29 de i go pinis bihain long hevi bilong kilim ol dispela asples man i kamap na ol pipel i wok long wet yet long save long wanem samting bai kamap long ol dispela lain i mekim trabel.

Mista Malabag i tok, dispela man long Tatana i bin stap laip taim polis i bin go long ples na holim pasim na paitim na karim i go, tasol bihain ol i karim em i go tromoi long Pot Mosbi Jeneral haus sik na em i dai pinis. Em i tok, dispela man i no bin gat wanpela gan o samting bilong pait taim ol polis i kisim em i go, tasol taim ol famili i go painim em, em i dai pinis.

"Blut bilong tripela man, tupela bilong Hanuabada na wanpela bilong Tatana i wok long kraik yet long stretpela pasin mas kamap long bekim dai bilong ol. Mi askim dispela nesen na polis komisina

olsem ol polis i painim pinis wanem ol polis i mekim dispela rong o no gat?" Mista Malabag i tok.

Em i tok, ol pipel bilong Hanuabada na Tatana em ol lain bilong laikim bel isi na ol i save mekim wok bilong ol yet na stap. Tasol nau ol i laik save wanem taim bai ol polis na gavman bai stretim toktok bilong ol polisman husat i bin kilim ol dispela tripela man.

"Mi laik tok save olsem 4,000 pipel bilong Hanuabada na Tatana i sainim nem pinis long putim ol rot blok long 23 Mas sapos ol i no harim wanpela gutpela toktok i kam long gavman," Mista Malabag i tok.

"Taim ol i bin pasim rot bihain long tripela man i bin dai, em yumi Papua Niugini i lukim tru kala bilong dispela kain pasin bikos olgeta bisnis i hat long ran bikos i no bin gat fiul. Ol pipel i gat bilip long dispela gavman na ol i wet yet long harim wanem tok bai kam long ol." Em i tok.

"Na pasin bilong polis i paitim na bagarapim ol pablik em i wanpela hevi bilong nesenelel sekiuriti. Ol wantok bilong yumi long Pasifik bai tingting wanem long yumi taim ol i wok long redim long kam bilong 2015 Pasifik Gems long Pot Mosbi? Na yupela ting wanem long ol lida bilong ol Esia na Pasifik husat i wok long redi long kam long bikpela APEC miting long 2018? Gavman i mas mekim samting nau," Mista Malabag i tok.



MINISTRI BILONG LEBANA INDUSTRIEL RILESENS
OPIS BILONG WEKAS KOMPENSESEN

LONSIM CPPS

Minister bilong Leba na Industriyel Rilesens, Hon. Benjamin Poponawa bai lonsim Kleims na Prosesing Sistem (CPPS) Projek bilong Opis bilong Wekas Kompensesen insait long Crowne Plaza Hotel, long Fraide 6 Mas 2015.

CPPS em i komputa projek bilong stretim ol wekas kompensesen sevis bilong ol woklain insait long PNG.

Bilong save moa, ringim opis long telepon namba 321 3100

Tok Orait i kam long :

EVANELIA KINI
Sif Komisina



**Ristoresen,
Rifomesen,
Modenaisesen bilong Nesenel Palamen**

Wok bilong Spika bilong Palamen

Save long Palamen bilong yu wantaim Hon. Theo Zurenouc, MP.

Welkam long namba tri hap bilong "Save long Palamen bilong yu". Ating yu mas lainim ol wok bilong palamen las wik, we bai mekim lo, makim ol sitisen, makim gavman, mekim gavman na tok orait long nesenel baset. Tude, mi laik toktok long yu long "ol wok bilong Spika bilong Palamen".

Spika bilong Haus

Spika em i memba bilong Palamen we ol i makim em long stap olsem bos bilong palamen. Dispela em olsem em bai makim ilektoret bilong em yet, na long lukautim ol bung i save kamap insait long SembabilongHausPalamen.

Makim Spika

Olgeta 111 memba bilong palamen i save vot long makim nupela Spika. Taim ileksen i pinis na palamen i op, ol i save hait na vot insait long Palamen. Spika em i memba na gat planti eksperiens, na gavman save makim em. Spika i mas mekim wankain pasin long olgeta memba bilong palamen.

Wok long Semba

Spika i gat planti wok long sembaolsem:

- Lukautim bung bilongHaus long sesen, olsemwanpelasiaman i save lukautimmiting
- Was long ol lo bilonghausol i kolimstendingodaol i mas bihainim
- Stapinsait long olseremoni bung olsemolforen het ovstet i toktok long palamen.

Wok bilong Institusen

Taim spika i no stap lo semba, em i save wok long wanpela opis long palamen na em i gat sampela wok olsem:

- Olgeta wok bilong palamen edministresen olsem ol baset, projek, wokman na givim ol opis long ol memba bilong palamen
- Wok wantaim klak bilong palamen long save olsem sampela sevis long Palamen haus i orait.
- Makim palamen long wok wantaim Nesenel Eksekutiv Kaunsel (NEC), gavman, Gavana-jenerel na ol narapela palamen o het man bilong ol narapela kantri.

Mak bilong Vot

Spika i no save stap nsait long dibet. Spika i no save vot tasol sapos i gat tai, em Spika save putim las vot.

Sia bilong Spika

Sia bilong Spika i save stap long arere bilong semba na i save lukluk long ol sia i lain olsem leta C. Em i hap we olgeta memba i ken lukim Spika na Spika i ken lukim na harim olgeta samting i kamap insait long semba. Maikro pon bilong Spika i save on olgeta taim, i no olsem bilong olnarapela memba. Long wanem ol i ken harim em olgeta taim na em i ken stopim nois.

Meis

Meis i save soim piksa olsem atoroti bilong Spika long olgeta miting long semba. Em i stap namel long tebol long Haus taim Spika o deputi bilong em i sidaun long sia long taim bilong sesen.

Histori

Opis bilong Spika i go bek olsem long 13 senseri long Englan. Pastaim long Englan, Spika i save tok save long king long ol disisen long palamen. Wok bilong Spika long dispela taim i bin gutpela. Ol i save kilim sampela Spika, putim ol long kalabus o rausim ol long ples bilong ol taim ol i makim maus bilong palamen na salensim atoriti bilong king.

Mama Lo bilong PNG em i wankain olsem sistem bilong palamen demokrasi tasol wok bilong Spika long semba i no wankain olsem long Englan.

Long narapela atikel, bai mi toktok wantaim yu long "Wok bilong Klak bilong Palamen". Lukim websait bilong mipela long www.parliament.gov.pg bilong lukim moa wok bilong Palamen Komiti, stori bilong wan wan Memba, ol wok bilong kamapim lo, ol wok bilong semba, enuel palamen peformens ripot na planti moa. Long save moa long Memba bilong yu na ol gutpela wok bilong em, salim teks wantaim namba wan nem na las nem bilong em i go long telepon namba 70000300. Sapos yu laik save moa long ol sistem bilong palamen na we bilong wok, salim email i go long speaker@parliament.gov.pg o Ring long Sivik na Edukesen Menesa, Sarufa Haro long Ph: 3277448

Save long Palamen bilong yu

Nature Park i selebretim Wol Wail Laip De

Esther Bralyn Wani i raitim

NATURE Park i selebretim Wol Wail Laip De long luksave olsem wail laip i bikpela samting, na long lukautim ol. Selebresen i bin kamap long las wik Satade long Pot Mosbi Nature Park.

Dispela em i namba wan intanesenel selebresen long PNG bihain long las yia taimYunaitet Nesens i makim Mas 3 olsem Wol Wail Laip De bai wankain wantaim aniveseri bilong Konvensen bilong Intanesenel Tred long Enderjed Spises (CITES).

Mis PNG, Grace Nugi i kam olsem embeseda bilong Wail Laip Konsevesen Sosati (WCS) i tok em i wok long painim aut olsem ol pipel long Hailans i save kilim planti naispela kala pisin long wokim bilas. Long dis-

pela em i painim aut wanem hap ol i save kilim na wanem hap i no gat bai ol i ken lusim ol dispela pisin stap.

Edukesen Supavaisa bilong Nature Park, Amos Babage, i askim ol lain long promis olsem ol i no inap kaikai walabi mit na ol i ken kaikai ol mit long stoa long wanem, dispela i mekim ol man i kilim ol walabi.

Em i tok moa olsem i gat wanpela kapul we i no save stap long ol narapela kantri long wol, em i stap long PNG tasol. Mista Babage i tok yumi mas lukautim ol na no ken kilim ol kapul na ol narapela enimal long bus.

Royal Sosaiti bilong Privensen long Kruelti long ol Enimal (RSPCA) wantaim WCS i bin sapotim dispela de, tu wantaim Tura the Kokomo.



Ol man na ol pikinini i promis long dispela buk bai ol i no inap kaikai bus mit olsem walabi long Wol Wail Laip De.

ELC Is Simbu Distrik salim ol pasto long skul

Paulus Tali i raitim

NUPELA Sios Distrik em ELC Is Simbu Distrik i bin salim 9-pela nupela yangpela man

I go long Logaweng Semineri long Finschhafen long Morobe Provins.

Ol yangpela i kam long Mu Seket na Kote longYabim Seket.

Dispela bai bringim namba bilong ol yangpela insait long Distrik i go antap long strongim wok Gutnius.

Is Simbu Distrik em i nupela distrik insait long Evangelikal Luteran sios long PNG bihain em i bin lusim Simbu ELC Distrik.

Nau em i kamap namba 17 ELC /PNG distrik.

Long lukluk bilong sios long Ist Simbu, i gat ol Kristen bilip man meri we planti em ol Luteran na liklik sios tu i stap we ol i save wok bung.

Nainpela yangpela nau i stap long Logaweng Semineri.

James Maima bilong Mu Seket i tok em i kam long nupela ples Logaweng i no olsem ples bilong em long Simbu we i kol ples.

Em i tok long Logaweng Semineri em blesing eria we em i lukim planti

samting i pulap long we God i blesim.

Long wankain taim, yangpela man husat i wokim namba wan yia long semineri i tokim sios nius olsem bilip bilong em na ol arapela brata em, ol i kam long Is Simbu long skul na kism moa Tok bilong God long Baibel Tioloji. Na kamap ol wokman bilong bikpela Jisas na go bek long asples na autim tok bilong God long strongim ol sipsip i no ken lus.

Ol 9-pela treni pasto bai stap moa long 5 yia trening, na dispela yia 2015 em namba wan yia bilong ol.

Long dispela yia bai ol i lukim wanpela bilong ol yet i greduet na go bek long as seket bilong em long Mu Seket.

Senia Pasto long Is Simbu, Moses Kania i tok em i amamas long lukim ol yangpela i amamas long aplai i kam long pasto trening.

Pasto Moses i tok moa olsem Is Simbu em i nupela distrik na ol i laikim moa yangpela long kamap ol wokman bilong sios olsem pasto, ivanjelis na wokmeri long kam bek long distrik na wok namel long seket, peris na kongrigesen long bringim moa lait bilong Gutnius namel long ol man meri.



PIH Saveman Nius

"I kam long Pacific International Hospital Port Moresby"

70 Dokta i go long CME long PIH

PASIFIK Intenesenel Haus sik (PIH) i bin holim namba wan semina o miting bilong ol speselis dokta bilong haus sik wantaim ol narapela dokta bilong PNG long las wik Sarere 28 Februari, long nupela PIH haus sik long 3-Mail maunten long Pot Mosbi.

Samting olsem 50 o moa ol dokta na ol teknisen bilong PIH yet, Pot

Mosbi Jeneral Haus sik na ol narapela provinsal jeneral na riferal haus sik i bin kamap long dispela miting.

Long strongim stori bilong em olsem em i PNG senta bilong ol speselis medikal sevis, PIH i holim dispela semina ol i kolim, CME o (Continuing Medical Education) semina.

I no longpela taim i go pinis long

13 Februari, Praim Minista Peter O'Neill i bin opim dispela nupela haus sik.

Dispela CME i kamap long opim rot bilong nupela we, Minista bilong Stet Enteprais, Ben Micah na PIH Siaman, Sir Moi Avei i bin toktok long taim bilong opim, olsem em i bikpela samting tru long yumi gat sans wantaim dispela nupela haus

sik long i gat ol speselis dokta i stap insait long kantri. Olsem na ol i mas givim save bilong ol i go long ol asples Papua Niugini dokta na ol narapela teknisen na woklain bilong helt.

Ol toktok we i kamap long Sarere, 28 Februari, em bilong ol speselis dokta we i lukautim na yusim ol bikpela ol medikal teknoloji

masin we i bringim mak bilong PNG heltke i go moa long kisim wol standet wantaim nupela PIH.

Em nau! Ol Papua Niugini bai i no moa tingting long go long ausait kantri long kisim helpim. Olgeta dispela samting i stap pinis long PNG na ol speselis dokta tu i kam stap we i ken lainim ol asples dokta bilong Papua Niugini stret.

Sampela moa toktok bilong ol speselis sevis helt ke long Tok Inglis

The talks last Sat., 28 February, was by the specialists who represent the advanced medical technologies which have been a great leap forward in PNG healthcare ever since the inauguration of the new PIH.

Dr. Jack Amana, Cardiologist of the Sir Buri Kidu Heart Foundation, opened the round of talks with a discussion on "The Evolution of Coronary Artery Disease in Papua New Guinea."

"Acute Coronary Syndromes" was the topic of Dr. Richard Chan, Interventional cardiologist of PIH. After his talk were the talks of Dr. Vineet, PIH Consultant Interventional Cardiologist of PIH and the talk of Dr. Om-Prakash Sharma, Chief Cardio Thoracic Surgeon of PIH.

These cardiology capabilities allow for angiograms, angioplasty, and an all-year-round availability of open heart surgery, care of Dr. Sharma, to be done right here in PNG. Procedures for these cardio treatment options will be done at PNG's first Cath Lab, and first fully dedicated cardiac operating theater.

Dr. Alfonso Blanch, consultant radiologist of PIH, gave a talk on interventional radiology and neurosciences, and will discuss about the MRI, Magnetic Resonance Imaging, the first ever in PNG.

Dr. Sudesh Subedi, PNG's first retina surgeon, talked about what is now available in terms of retina surgery. Dr. Jonathan Oblefias, the head of pathology of PIH, introduced to the doctors what the laboratory of PIH could do to assist them.

An abstract of Doctor Sharma's talk - EVER since the first bypass grafting (CABG) was done, there have been continuous innovations in this field.

The gold standard is CABG performed using heart lung machine in which the heart is arrested and the bypass grafting is done. In the mid-90s, a group of cardiac surgeons started performing bypass grafting on beating heart using special stabilizers.

Initially one heart artery of the heart used to be bypassed but as



Panel bilong ol speselis dokta long taim bilong CME; L-R Dokta Richard Chan, Dokta O. P. Sharma, Dokta Vineet, Dokta Jack Amana.

time elapsed, continuous research and modifications in this field led to development of special devices which enabled the surgeons to achieve complete revascularization of the heart.

This has led to the emergence of minimally invasive bypass grafting

with the help of sophisticated instruments and equipment which is reserved for special subset of patients.

With the advent of development in the field of Endoscopy it prompted cardiac surgeons to make total endoscopic possible. Now CABG is done using Robot which is also

known as ROBOCAB.

To enhance the growth of heart blood vessels the emergence of stem cell therapy looks very promising though it is in its infancy.

(for further details, you may text to 7155-8866 or email to publicrelationspih@gmail.com)

Ol Speselis PIH dokta redi long lainim ol PNG Dokta

SEMINA bilong Continuing Medical Education (CME) i bin kamap insait long nupela PIH haus sik long Pot Mosbi las wik Sarere, 28 Februari, em i namba wan bilong planti moa kain miting olsem long kamap bihain taim.

As tingting bilong PIH long kamap wantaim dispela kain bung em long

kisim save bilong ol speselis dokta bilong arapela kantri we nau i kam wok wantaim PIH long lainim ol asples Papua Niugini dokta.

Sir Moi Avei, Siaman bilong PIH i opim dispela bung bilong ol dokta we samting olsem 50 dokta olgeta i kamap. Planti i bin kam long ol provins na moa ol speselis dokta na

teknisen bilong PIH yet i bin stap.

Sir Moi i bin mekim luksave long ol dokta bilong ol provins na Pot Mosbi Jeneral Haus sik wantaim Nesenenel Dipatmen bilong Helt na long Cairns. Em i tok dispela kain bung em wok bilong Praivet-Pablik Patnasip.

"Pastaim bai yumi askim, em bai

inap long yumi wokim Pablik-Praivet patnasip o no gat? Dispela bung nau i soim yumi olsem kain wok bung em inap kamap long kantri bilong yumi." Sir Moi i tok.

Em i tok moa olsem ol speselis bilong PIH i laikim ol Papua Niugini dokta long wok wantaim ol na bai ol i ken kisim save long wok bilong ol.

I gat ol nes bilong Filipins tu i kam wok long PIH na ol tu i ken lainim ol Papua Niugini nes long mekim wok long intenesenel standet.

Bilong wanem, PIH em i putim nem long wok long intenesenel standet olsem na ol i ken lainim ol lokal nes long wok long intenesenel helt standet.

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH !



3Mile Hill, Taurama Rd, Port Moresby * Call 311-3000 or 323-4400 or text 7155-8866 or email: pihopd@gmail.com

MS 14 bringim bel isi long Ramu komyuniti

James G. Kila i raitim

OL SPESEL UNIT o Mobail Skwat Polis lain i save mekim bikpela wok tru long sait long lukautim sekiuriti long ol bikpela risos projek insait long kantri bilong yumi.

Wok bilong ol MS i save mekim komyuniti na divelopa bilong ol risos projek i stap wantaim bel isi na amamas bikos sekiuriti em bikpela samting tru.

Poto i soim tripela strongpela memba bilong Mobail Skwat 14 bilong Goroka, Isten Hailans provins nau i stap long lukautim sekiuriti long Ramu NiCo Projek long Madang provins.

Dispela MS 14 bilong Goroka em Komanda bilong ol John Midi i go pas long en. Em ol trupela lain bilong hatwok na harim tok na bihainim stret wok bilong gavman

long lukautim lo na oda long eria ol i go wok long en.

Tupela kampani bilong MS 14 nau i stap long Madang. Wanpela i stap long Basamuk Rifaineri bilong Ramu NiCo na narapela i stap antap long Kurumbukari Main sait.

Planti lokal lain insait long Ramu Projek eria long Basamuk na Kurumbukari i amamas long MS 14 bikos ol i stap bilong ol i bringim bel isi na lo na oda i stap orait long komyuniti.

Ol lain Mobail Skwat i save mekim bikpela wok tru long givim sekiuriti long ol bikpela risos projek long kantri. Wok bilong ol long ol projek eria em long lukim olsem ol risos projek we kantri i save kisim mani long en i ran gut na bihainim stret plen bilong divelopa wantaim Gavman.



Tripela memba bilong MS 14 i redi i stap nau long duti long Madang. Poto; James G. Kila

Lotu long kamapim senis

Esther Bralyn Wani i raitim

OL Polis long Pot Mosbi i bin holim wanpela sios sevis wantaim bikpela tingting long kamapim senis insait long polis fos.

Polis Minista Robert Atiyafa, Polis Komisina Geoffrey Vaki na ol narapela polis man na meri i go long dispela dedikesen o sios sevis long Sioni Kami Memorial Sios long Pot Mosbi.

Dispela dedikesen i kamap long wanem, ol polis i wok long kisim planti nem no gut long pablik na midia olsem ol i no lukautim ol pipel na sevim kantri.

Planti toktok i kamap long midia olsem ol i kilim ol pipel nating na ol i no bihainim wok bilong ol taim ol i bin apim han na tok ol bai sevim kantri na God.

Mista Vaki i tok dispela dedikesen i bikpela

samting long wanem, em i laikim senis i kamap long ol Royal PNG Konstabulari (RPNGC). Em i tok em i inap nau long ol kain pasin na em tok taim ol polis i kam aut long polis kolis, taim bilong lukautim ol pinis.

Em i tok moa olsem bai gat wanpela bung gen bilong ol Provinsel na Divisenel tim long skul na kisim gut save gen na kamapim senis long kantri.

Likliik brata bilong Polis Komisina, Pasto Philip Vaki i salensim ol polis olsem em i taim bilong senis na lukautim na sevim ol pipel na kantri.

Em i tokim ol polis long askim ol yet long wanem samting ol bai mekim wan wan long kamapim senis.

“Em bai hat tasol yu ken mekim olgeta samting wantaim Jisas husat i save givim strong (Pilipins 4:13), Pasto Vaki i tok.

PINA tok amamas long Media Kaunsil PNG

PASIFIK Ailan Nius Asosiesen (PINA) i salim tok amamas bilong en i go long ol wantok pren bilong midia long Midia bilong Papua Niugini long kirapim bek Media Kaunsil (MCPNG) wantaim ileksen bilong nupela eksekutiv memba las wik.

Ol memba bilong midia i bin makim ol nupela eksekutiv long Fraide 27 Februari, insait long Pot Mosbi. Dispela nesenel bodi i bin stap nating, i no gat maus inap long tupela yia pinis bikos i no bin gat mani long mekim wok bilong en.

“Dispela em i gutpela nius long PINA bikos MCPNG, olsem wanpela nesenel midia asosiesen, i bin wanpela strongpela sapota bilong ol rijinol midia oge-naisesen na ol wok bilong en,” Moses Stevens, Presiden bilong Pacific Ailan Nius Asosiesen i tok.

“PNG em i bikpela

memba bilong rijinol midia famili bilong mipela. Taim ol i no soim pes long ol wok bilong PINA inap long tupela yia em i mekim mipela long rijinol midia i tingting planti, tasol nau em i kam bek gen na mipela i opim han na tok welkam.

Rijinol midia bai lainim planti samting long strongpela midia bilong PNG, na PINA i laik helpim long bringim bek.

“Dispela tupela yia em i bikpela samting bikos PNG bai kamap papa long tupela bikpela bung bilong rijon na intenesenel miting.

Long dispela yia, PNG bai holim Pasifik Gems long Julai na Pasifik Ailan Forum Lida miting long Septemba. Long 2018, namba wan taim long stori bilong ol Pasifik nesen, PNG bai go pas long holim dispela strongpela miting bilong APEC.

Mista Stevens i tok, em ol

kain bung we Pasifik midia bai lukluk long PNG midia long i go pas na stiaim na sapotim ol narapela midia long Pasifik long kisim nius bilong ol.

Em i mekim singaut i go long ol nupela eksekutiv bilong MCPNG long helpim PINA long redi long ol dispela bikpela bung na wok bai kamap klostu taim.

“Mipela i laikim MCPNG long kirap na mekim wok strong insait long ol nesenel na rijinol midia olsem long eria bilong trenim na strongim save bilong ol midia profesenal. PINA bai redi tasol long toktok wantaim na wok bung wantaim MCPNG long holim na ranim ol trening, Stevens i tok.

PINA i tok kongresulesen long nupela MCPNG Presiden, Alexander Rheeeney, na ol eksekutiv tim bilong em.



Polis Komisina, Geoffrey Vaki i toktok wantaim Mark Goina bilong Papua Niugini Difens Fos long pinis bilong Sevis.

Ol kalabus long Vanimo i no gat sel

OL polis sel long Vanimo, Sandaun provins i wetim polis hetkwata long Pot Mosbi long givim K58, 000 bilong stretim haus kalabus.

Provinsel Polis Komanda, Robert Gesa, i tok ol tok long givim mani long neks

wiks.

Dispela mani i bihainim kot oda i tokim polis hetkwata long stretim polis sel long Vanimo.

Mista Gesa i tok ol polis i no lokim ol saspek na ol kalabus man long polis ste-

sen. Ol i stretim tok wantaim ol Koreksenal Sevis long Vanimo long putim ol long wanpela liklik kalabus bilong ol.

Em i tok moa olsem taim ol i givim mani em bai stretim ol sel long polis stesen.

Hailans Haiwe i no seif

“Ol papa bilong ol Pablik Moto Vikel (PMV) wantaim ol praiwet kar i mas stop long raun long bik nait o moning bikos ol raskol i painim sans long stilim ol kar na samting olsem long dispela man i stilim samting long PMV long las wik Fonde,” Provinsel Polis Komanda bilong Hela, Mark Yangen i tok.

Ol polis long Hela i painim ol raskol man husat i bin stopim ol kar long Hailans Haiwe na sekim ol PMV na ol pipel antap long kar na stilim ol samting bilong ol.

Mista Yangen i tok ol i mekim olsem long

las wik Fonde.

Long dispela em i makim wanpela tim bilong ol polis long lukautim Haiwe na putim was long ol raskol.

Dispela stil pasin i kamap long 6.30 long moning taim olsem 6-pela man i karim tupela strongpela gan i kam. Ol i kisim K5,000 wantaim ol gutpela samting bilong ol pasindia na ranawe.

Mista Yangen i tok dispela em i namba tu stil pasin long las mun na em i namba 6 stil pasin long dispela bikpela haiwe.

PNG SABL wok i kamapim wari

I kam long ABC

GAVMAN i mas lukluk gut gen long dispela Special Egrikalsa Bisnis Lis.

Dispela em toktok bilong wanpela yangpela meri, Tamara Mandengat husat i wok olsem Komyuniti Kempein Opisa wantaim wanpela NGO em Act Now PNG.

Em i bin autim dispela tok-

tok long Pacific Youth Forum Against Corruption miting we i bin pinis long Fiji long dispela wik.

Ol pipal bilong PNG iwok long wari tru yet long dispela wok bilong Spesel Egrikalsa Bisnis Lis o SABL, na gavman i mas harim wari bilong ol na stopim dispela kain wok.

Em i tok dispea wari bilong “land grabbing” oa pasin bi-

long kisim nating graun aninit long korap pasin i wok long kamap bikpela long ol Melanisen kantri olsem PNG, Solomon Ailan na Vanuatu.

Mis Mandengat i tok tu olsem planti pipel long PNG i lusim graun bilong ol pinis aninit long dispela SABL, tasol gavman i no mekim wanpela gutpela samting long helpim ol.

Orientesen bilong ol nupela sumatin long UPNG

Esther Bralyn Wani i raitim

OL nupela sumatin bai mekim namba wan yia long Yunivesiti bilong Papua Niugini (UPNG) i bung long Mein Leksa Tieta (MLT) long orientesen na harim toktok bilong skul.

Minista bilong Haia Edukesen na Rises Sains, Malakai Tabar, Seketeri bilong Lo na Jastis, Lawrence Kalinoe wantaim Vais Sensela long UPNG, Albert Mellam na ol narapela bikman na meri bilong skul i stap long dispela bung na welkamim ol nupela sumatin.

“Mipela olgeta i wari long pinis bilong gem. Yupela go long klas o no gat em i no hevi bilong mipela. Yupela mas kisim gutpela akedemik mak stret na yupela mas

skulim yupela yet long wanem UPNG i lukim yupela olsem bikipela man na meri i no olsem sekenderi sumatin,” Vais Sensela Mista Mellam i tok.

Mista Tabar i tokim ol nupela sumatin long helpim na mekim kantri go het we ol i mas bihainim na tingting gut, wokim stretpela pasin na bai kamapim amamas long komyuniti.

Long wankain taim, Mista Mellam i tokaut long 50 aniveseri bilong UPNG i kamap long dispela yia. Em i tok long makim dispela 50 yia bai i gat K2 na K5 koin mani bai tingim dispela aniveseri bilong UPNG.

Ol nupela sumatin insait long MLT.



Ol Edukesen tim bilong Nature Park.

Skul program i redi

EDUKESEN Dipatmen bilong Pot Mosbi Nature Park i plenim bikipela Skul Ekskusen Program long dispela yia long helpim ol tisa wantaim ol program long klas.

Dispela tim i go raun long ol praimer na sekenderi skul na ol klasrum insait long Pot Mosbi long karim aut iven kalenda bilong Nature Park long ol program bilong ol.

Supavaisa bilong Eduke-

sen, Amos Babaga, i tok, “Taim mipela i mekim iven kalenda em i isi long go long olgeta skul long Pot Mosbi na promotim ol edukesen program, ol spesel iven na program long skul holidi bai givim olgeta pikinini sans long kam lukim Nature Park.”

Mista Babaga i tok moa olsem Pot Mosbi Nature Park i save gat wanpela gutpela edukese program we i narapela kain save gat ol tisa

we Nature Park save kisim ol long wok.

Ol holidi program bai kamap long Nature Park wantaim “Pikinini bilong Konsevesen Program” bai stat long April 13 long tem wan skul holidi.

Ol i putim “Wol Enviromen Wik” long Jun 1 inap 5 we i bin gat olsem 1,000 sumatin long 23 klas long 10-pela skul i bin go long Nature Park las yia.

Ol sumatin i painim wok i gat sans

Esther Bralyn Wani i raitim

AIR Eneji wantaim Papua Niugini Australia Alumni Asosiesen i holim namba tu Career Fair we i givim sans long ol pipel i painim wok yet na ol sumatin i pinisim skul long lukim ol kampani na toktok wantaim ol long Crown Plaza Hotel long Pot Mosbi las wik.

Long dispela yia i gat olsem 25 kampani i kam lukim ol sumatin na ol pipel i

painim wok. Insait long ol kampani, 22 indastri sekta na 3-pela edukesen lain long Australia.

Menesa bilong Bisnis Developmen PNG long Air Eneji, Tara Taylor i tok olsem long namba wan de tasol ol i bin gat 750 pipel i painim wok na ol sumatin.

Mis Taylor i tok as bilong dispela program em long kamapim bris namel long saveman i no gat wok na ol kampani.

Long wankain taim, Hai Komisina bilong Australia, Deborah Stokes, i tok olsem Australia gavman i sapotim edukesen long PNG bikos em i develop yet na taim ol i laikim planti wokman na meri ol i laik helpim na skulim planti man na meri.

Mis Taylor i tok tenkyu long ol sponsa olsem Coca-Cola, Nesenel Airport Kopresen (NAC), Neks ov Kin na Crown Plaza long sapot bilong ol.



Minista bilong Haia Edukesen na Rises Sains, Malakai Tabar, Seketeri bilong Lo na Jastis, Lawrence Kalinoe, Vais Sensela, Albert Mellam na ol hetman na meri bilong UPNG long Orientesen bilong nupela sumatin long UPNG.



Ol lain i makim PNG Power i kam toktok long ol sumatin na ol pipel i painim wok.

Helt woka trening skul i mas go bikpela long PNG

SEKETERI bilong Nesanel Helt Dipatmen, Pascoe Kase i tok helt woka trening skul long PNG i mas go bikpela, olsem na em i tok save long ol lain i save givim trening long ol i mas kisim gut akreditesen long holim hai standet bilong ke long PNG.

Taim wanpela man o meri Papua Niugini i kamap long ples bilong kisim tritmen, ol i laikim gutpela sevis we ol lain i save gut long wok na i gat gutpela skul bilong helt na i gat gutpela bel bilong helpim ol.

Dipaten bilong helt i gat dispela kain tingting olsem na wantaim helpim bilong Australia Gavman, em i wok long stretim gen ol trening skul bilong ol nes na komyuniti helt woka insait long kantri.

Dispela em i bikpela plen we gavman helt wokfos plen i wok long bihainim long bringim moa

namba bilong ol helt woka i go insait long helt sevis.

“Mipela i mas holim hai standet bilong heltke long PNG. Long dispela as, ol helt woka trening skul i mas kisim akreditesen aninit long PNG Nosing Kaunsil na Medikal Bot i stap long Dipatmen bilong Helt.

“Lo i tok long olgeta nupela helt woka husat i greduet long wanpela helt skul olsem nes o helt woka, i mas rejista na kisim setifiket pastaim long ol i ken wok insait long helt sekta bilong PNG,” Mista Kase i tok.

Olgeta trening program i save kisim tok orait bilong Dipatmen bilong Helt pastaim long ol i stat. Na sapos i gat ol sampela lain i laik givim helt trening nau tasol ol i no klia tumas sapos ol i kisim akreditesen o no gat, ol i mas askim moa long Dipatmen bilong Helt.

Provinsal dokta kamap long CME semina

Frieda Sila Kana i raitim

DOKTA Cathy Timothy, Fisisien bilong Angau Memorial Jeneral Haus Sik long Lae i bin amamas tru kamap long CME semina bilong PIH las wik Sarere bikos em i gat sans long harim ol speselis dokta bilong ol bikpela kain sik we i save kilim planti pipel long kantri.

Dokta Timothy i tok long Angau Memoriel haus sik ol i gat wanpela ilektorel kadiogram (ECG) tasol bilong luksave na sekim hat pam bilong ol sik lain taim ol i pilim hat i no pam gut tumas o i soim sain bilong hat atek. Ol i gat narapela stres tes masin na em tasol.

Olgeta narapela wok bilong sik long lewa em ol i save salim i go long Pot Mosbi Jeneral haus sik tasol. Tasol PMGH haus sik tu i gat mak long givim marasin tasol na i stop long hap.

Tasol nau wantaim PIH intenvensonal masin bilong helpim hat disis na ol narapela bikpela sik, em i gat hop long ol siklain bilong Papua Niugini.

“Yumi ken go moa long givim marasin tasol. Nau wantaim ol kain masin PIH i gat, ol i ken wokim operesen long kantri yet,” Dokta Timothy i tok.

“Mipela i laikim gavman long helpim ol siklain na ol pipel bilong yumi long sabsidais o putim liklik mani long helpim na daunim ol bikpela kos bilong kisim speselis tritmen olsem long PIH PMGH em i wanpela pablik riferal haus sik na rot i stap pinis long salim ol siklain i go long dispela haus sik,” Timothy i tok.

Tasol ol siklain i gat rait long helpim ol yet, na sapos ol i laik long kisim moa speselis tritmen na helpim long PIH, em ol i ken go wantaim riferal leta bilong dokta bilong ol.

“Sapos PIH i opim dua long helpim yumi wantaim trening, yumi mas kisim dispela kain sans long mekim sampela trening bilong wok speselis long hia, na bihain go long ol narapela setifaid trening institutusen long ovasis long kisim setifiket bilong wok stret,” Dokta Timothy i tok.

Tasol sapos ol dokta bilong yumi i go kisim trening long ovasis, gavman i mas strongim dispela wantaim ol gutpela ikwipmen na masin bilong wok tu. Ol dokta husat i bin kamap long dispela semina bilong PIH i bin amamas bikos em i wanpela step i go fowod long kamapim gutpela heltke long kantri.

Maritaim Imejensi Kontek Senta op long Alotau

MILEN Bei Provins nau i gat wanpela 24 haa Maritaim Imejensi Kontek Senta long Alotau.

Gavana bilong provins, Titus Philemon i opim dispela senta long dispela wik.

Ol senia edministresen opisa, wantaim ol lain bilong maritaim na disasta sekta wantaim Gavman Rilesens Dairekta bilong Digicel, Gary Seddon na Colm Breheny, Het ov Kastom Kea Autos Senta i bin stap long witnes long Gavana i opim dispela senta.

Dispela disasta imejensi kol senta i bin stat wok pinis long Desemba las yia na Gavana Philemon i mekim luksave long wok wanbel namel long provinsal edministresen na Digicel.

“Long taim em i bin kirap long Desemba, dispela senta i bin helpim mipela gut long taim bilong maritaim imejensi na i helpim long harim ol singaut long ol asples lain i raun long solwara,” Gavana Philemon i tok.

Kontek senta i kisim nem bilong leit Eric Balaria, husat i bin dai long las yia. Em i bin

holim wok olsem Provinsal Disasta na Imejensi Kodineta na em i bin go pas long kamap bilong dispela nupela wok.

Gary Seddon na Colm Breheny i makim Digicel i bin tok tenkyu long Gavana na tim bilong em long gutpela tingting ol i gat long Digicel i ken bringim nupela samting i go insait long Milen Bei.

Seddon i tok, “Dispela senta bai kirapim gen ol program bilong Milen Bei long ol maritaim imejensi rispons.

Em i kam long taim stret long sevim ol planti laip we bai lus long solwara sapos i no gat singaut i kam long taim ol pipel i raun long solwara olsem,” em i tok.

Nau yet, Disasta Imejensi Kontek Senta i gat ol wokman bilong Digicel na ol i save wok olgeta de na nait.

Ol lain long solwara bai ring long namba 1500 long toktok wantaim ol lain long kol senta na tok save long wanem hap ol i stap na ol lain bilong helpim i ken go painim ol.

NCD i kamap bikpela long PNG

DOKTA Jack Amana bilong Sir Buri Kidu Faundesen bilong Pot Mosbi Jeneral Haus sik i tok, Non Komyunikebol Disis (NCD) o Sik we i no save kamap long binatang i kalap i go i kam, i kamap bikpela nau long PNG na em bai i stap.

Dokta Amana i mekim dispela toktok taim em i bin kamap long CME semina bilong PIH las wik long Pot Mosbi.

Em i tok moa olsem nau ol sik we i save kamap long ol binatang na kalap i go i kam, olsem T.B, Leprosi, Malaria na HIV i wok long go daun bikos gavman i putim moa mani na wok i go long daunim ol dispela kain sik.

Tasol sik we i no save kamap long ol binatang i wok long go antap yet bikos long kain stail bilong laip na kaikai i stap nau long ol taun na ples. Em i tok long taim namba wan man i bin dai long hat atek long ol 1960 na i kam, ol haus sik na dokta i no bin save mekim orait ol lain i kisim hat atek bikos i no gat gutpela ikwipmen na save long kantri.

Long 1995, bihain long Sir Buri Kidu i bin dai wantaim sik hat atek, ol i bin kirapim nau Sir Buri Kidu Hat Faundesen long mekim luksave olsem dispela sik bilong lewa em i stap na gavman i mas mekim samting long helpim.

I luk olsem namba bilong ol lain i kisim sik long lewa i wok long go antap bikos namel long ol yia

1985 na 1987 tasol PMGH i bin lukim 20 siklain wantaim dispela sik na krismas bilong ol em namel long 24 i go long 75.



Dokta Jack Amana, Sir Buri Kidu Hat Faundesen, Pot Mosbi Jeneral haus sik.



Dokta Cathy Timothy, Fisisien long Angau Memorial Jeneral Haus sik, Lae.

MRA sekim SGP projek bilong ol meri

JAMES G. KILA i raitim

MINERAL Risos Atoriti (MRA) long las wik i go raun sekim ol wok bilong ol meri we PNG gavman i helpim ol aninit long Smol Gren Projek (SGP) wantaim mani i kam long Wol Benk.

Dispela mani bilong gavman i go long ol meri insait long ol hap ples bilong maining na petroleum risos projek bilong strongim ol long wokim egrikalsa na bisnis long helpim sindaun bilong ol.

Sasteinabiliti na Plenning Menesa bilong MRA, Stella Brere wantaim Jenda kodineta, Pentika Mambu i bin stap long Madang provins long las wik long bungim ol meri bilong foapela eria bilong Ramu Projek long kisim ol ripot bilong las tripela mun.

Dispela ripot em bilong wanem wok i kamap long tripela PMV trak em ol meri i kisim aninit long SGP we MRA i givim long helpim ol.

As tingting bilong SGP em long helpim ol meri long kirapim ol smol bisnis o strongim

ol bisnis we i stap pastaim wantaim bikpela tingting long helpim laipstail bilong ol meri long bihain taim insait long ol eria we maining i stap long en.

Stat long las wik ol opisa bilong MRA i bin go aut long kisim na mekim wok monitaring o sekap long ol ripot bilong olgeta meri grup long ol hap we main i stap na i mekim sampela kain senisim laip bilong ol, gutpela na no gut wantaim.

Long las wik Tunde i go inap long Fraide, Mis Brere i kisim ol ripot na harim ol toktok

bilong ol meri bilong Kurumbukari, Inlen Paiplain, Kostal Paiplain na Basamuk wimens grup insait long Ramu Projek long Madang.

Insait long dispela ol mama long Kurumbukari, Inlen Paiplain na Kostal Paiplain i baim tripela PMV trak long wokim egri-bisnis wok long sapotim ol meri long projek eria.

Ol lain long Kostail Paiplain tu i baim wanpela motobot long helpim ol bikos eria bilong ol em bikpela na solwara i karamapim bikpela hap tu.

Ol meri laikim Kas baim kar bilong ol

James G.Kila i raitim

OL MERI long 6-pela distrik bilong Madang provins i mekim strongpela askim i go long Gavana bilong Madang, Jim Kas i mas baim 6-pela kar na givim ol long mekim wok bilong ol.

Presiden bilong Bogia distrik Kaunsol bilong ol Meri, Martha Kapan i bin makim maus bilong ol meri long ol distrik na askim Mista Kas insait long wanpela miting long Madang las wik.

Dispela bikpela toktok bilong Misis Kapan i bin kamap long NBC Redio Madang long 'Sain Gamun' program long Mande nait we olgeta lain i harim hevi bilong ol mama insait long ol distrik long provins.

Pastaim long em i mekim

dispela toktok, Misis Kapan i givim tok tenkyu na amamas i go long Gavana Kas wantaim 6-pela nesanel palamen memba bilong Madang long sapotim bil o lo bilong ol meri long Palamen.

Dispela i soim olsem ol 6-pela MP bilong Madang i sapotim wok bilong ol meri.

Em i tok sapos Gavana Kas i ken baim kar bilong olgeta lokal level [gavman (LLG) presiden long Madang, watpo em bai no inap baim kar bilong ol meri bilong 6-pela distrik na tu Madang Provinsal Kaunsil ol Meri. (MPCOW).

Misis Kapan i tok ol presiden bilong ol Distrik Kaunsil bilong ol Meri i no save slip long ol hotel olsem na em i askim Gavana Kas long baim kar bilong ol.

Planti ol arapela mama i autim

bel hevi bilong ol tu olsem ol i no amamas olsem Madang Provinsal Gavman i no gat wanpela meri i makim ol insait long provinsal eksekutiv kaunsil (PEC).

Planti lain pablik long Madang tu i no amamas olsem ol draiva bilong ol kar we Gavana Kas i baim na givim long ol LLG presiden em i save karim ol spak man na dring raun.

Ol i save soim rabis pasin na i no olsem ol lidaman i makim ol pipel bilong ol.

Wanpela komyuniti lida bilong Usino-Bundi distrik, Mondu Kongia i tok olsem kain pasin ol dispela pablik sevan o wokman bilong ol LLG presiden i mekim em i no gutpela bikos em mani bilong pipel i baim ol dispela kar, na ol i mas yusim gut long wok bilong en stret.



Jenda kodineta bilong MRA i mekim toktok long sekim wok bilong ol meri bilong Kurumbukari long Madang las wik.

Fiji delegesen bai lukluk raun long Wewak

WANPELA delegesen bilong kantri Fiji bai mekim wanpela lukluk raun long Is Sepik provins long las wik bilong mun Mas, 2015.

Opis bilong Fiji Hai Komisina, Romanu Tikotikoca, long Fiji Hai Komisina long Pot Mosbi i tokaut olsem fes ledi bilong Fiji, Ledi Adi Koila Nailatikau, bai stap olsem het-meri bilong dispela delegesen.

Ledi Adi Koila Nailatikau em i gavana bilong Lau provins bilong Fiji na tu em i meri bilong presiden (Het ov Stet) bilong Fiji.

I gat tok i stap olsem meri spika bilong Fiji palamen tu bai kam wantaim Ledi Nailatikau.

Long nau yet Opis bilong Wewak Taun Meya, Charles Malenki, i kamapim wanpela komiti pinis long redim program na ol arapela samting long kam bilong delegesen bilong Ledi Nailatikau.

Opis bilong Fiji Hai Komisina Tikotikoca i tokaut olsem delegesen bilong Ledi Nailatikau bai kamap long Wewak long Mas 23 na stap

inap Mas 27, 2015 na lusim Wewak.

Wokabaut bilong Ledi Nailatikau na delegesen bilong em i bihainim wanpela wokabaut wanpela delegesen bilong Is Sepik, aninit long lidasip bilong Minista bilong Koreksenal Sevis na Memba bilong Wewak, Jim B. Simatab, i bin go long Fiji klostu long pinis bilong las yia (2014).

Dispela delegesen bilong Is Sepik i bin go long Fiji long sainim wanpela Memorendum ov Andas-tending (MOU) wantaim Lau provins bilong Fiji.

Dispela MOU i kliaim rot long Is Sepik na Lau provins bilong Fiji long wokbung wantaim long helpim wanpela na narapela.

Mista Malenki i tokaut olsem kam bilong delegesen bilong Ledi Nailatikau em i impoten long Wewak na Is Sepik provins.

Em i tok Is Sepik provinsal gavman i mas givim ful sapot na helpim komiti we long nau yet i wok long redim program na ol arapela samting.



Dispela tripela meri bilong Begesin, L-R Linda Barnabas, Laidi Russel na Betty Bogeng em ol eksekutiv bilong Inlen Paiplain wimens grup long Ramu Projek. Ol i mangal long baggi long Madang Risot Hotel long taim bilong miting wantaim Mineral Risos Atoriti (MRA) las wik. *Poto: James G. Kila*

Jenda helt trening bilong ol helt woka

YUNAITET Nesesen Populesen Fan (UNFPA) na Nesanel Dipatmen bilong Helt (NDOH) i bin holim wanpela woksop long kamapim wanpela karikalam bilong jenda trening bilong ol helt woka, long las wik insait long Madang.

Dispela em i namba wan taim bilong dispela kain karikalam i kamap. Em i soim olsem planti lain moa nau i kisim save pinis long wok bilong Jenda helt kea program.

Woksop i bin toktok moa long jenda besvailens (GBV), na rot em i save givim hevi

long ol helt sevis na long speselis helt klinik kea bilong ol lain i save kisim bagarap.

Jenda besvailens o man paitim meri em i save kamap planti tumas insait long PNG.

Ol yangpela na bikpela meri i save kisim pen na bagarap long han bilong ol man planti taim.

Tasol i no gat inap toksave long kamapim gutpela polisi bilong stretim ol dispela kain hevi, o long lukluk na sekim ol hevi i stap long jastis sistem, na long banisim ol meri long dispela kain hevi.

GBV em i bikpela hevi tumas.

PNG Lo Rifom Komisen i putim ripot olsem long 1992 planti meri i kisim moa bagarap long haus taim man i paitim ol.

Dispela namba i go antap nau, olsem na NDOH i luksave olsem i mas gat nupela kain trening bilong ol helt woklain i kamap long luksave olsem jenda em i namba wan samting ol i mas i gat save long en taim ol i givim helt kea long ol siklain o meri, o man i panim hevi.

Ol helt woklain i kam long Nesanel

Dipatmen bilong Helt, Divine Word Yunivesiti, UNFPA na ol narapela haus sik. Ol i mekim ol toktok bilong jenda i mas stap insait long olgeta narapela program bilong helt sekta.

UNFPA i gat bikpela tingting long wok i nsait long PNG long daunim hevi bilong Jenda Bes Vailens o pasin bilong man i paitim na bagarapim meri na ol meri i ken kisim gutpela sevis na helt kea na ol i ken stap seif.

Poreporena Yunaitet Sios seket lonsim 2015 progrem

Veronica Hatutasi i raitim

“MI no kam long yupela i sevim mi, tasol long kamap olsem sakrifais long ol manmeri bilong graun, na lusim ol long kalabus bilong sin”, em hap toktok we Reveren Jacob Harry, Supa Minista bilong Yunaitet Sios long Poreporena Seket long ples Hanuabada ausait tasol long Mosbi siti i bin autim long ol Man na Meri Felosip ministri.

Sarere Februeri 20 i bin lukim lonsing bilong kombain Poreporena Man na Meri

Felosip 2015 progrem long Lahara Misin Stesen long Hanuabada yet.

Moa long 200 man na meri long Felosip Ministri i bin stap insait long progrem we i bin stat wantaim wanpela mas ol meri na ol man i bin mekim long wokabout i go long Lahara Misin Stesen na wokim lotu long lonsim 2015 wok na ektiviti progrem bilong ol.

Felosip Ministri i gat 6-pela grup long en. Em long Lahara Wimens De Felosip, Lakani Toi Wimens De Felosip, Lahara Mens Felosip, Lakani Toi Wimens Felosip, Lahara Wimens Nait Felosip na Lakani Toi

Memorial Sios Mens Felosip.

Dispela em i namba wan taim tu long kisim ol man Felosip grup i go insait long ministri.

I gat 200 felosip Ministri memba, tasol sampela i no bin kamap bikos ol i bin gat ol sampela arapela wok long dispela de.

Reveren Jacob i bin tokim ol meri olsem ol tu i mas kamap olsem ol wokman bilong Bikpela taim ol i karimaut ol wok long sevim pipel long ol famili, komyniti na sios.

Em i tok amamas tu long ol mama na meri long tok yesa long felosip bilong ol man i go insait wantaim ol.

Em i tok ol man i bos bilong famili na long dispela felosip grup, i gutpela long ol man na meri felosip grup long wok patna wantaim.

“Dispela yia i mas kamap olsem yia bilong ol bikpela senis long mekim wok bilong Bikpela,” Reveren Jacob i bin tok long skul tok bilong em i go long ol meri.

Vais Presiden bilong Wimens Felosip grup na masta bilong seremoni, Sisia Reva long tok welkam bilong em i bin tok ol meri i mas bihainim Jisas olsem trupela vain na lait bilong wol na soim dispela long ol wok bilong ol insait long famili, sios na komyniti.

6-pela man na meri felosip grup long Poreporena seket i bin kisim K30,000 i kam long Siaman bilong Motu-Koitabu Asembli, Miria Ikupu, long karimaut ol wok progrem bilong ol insait long wanpela yia.

Ol bai brukim long K5,000 mak long tilim long wan wan long ol 6-pela felosip grup.



Lakani Toi Memorial Sios De taim Wimen’s Felosip grup i sanap wantaim bena bilong ol.

Poto: Veronica Hatutasi

Sios meri felosip i helpim ol mama

Veronica Hatutasi i raitim

WIMEN’S Felosip grup i wok long helpim planti mama na meri long Poreporena Wimens Felosip grup.

Boni Eno i wanpela elda na mama na grup memba bilong Lakani Toi Memorial Sios (LTMC), na Wantok i bin stori wantaim em long ol wok we ol i save mekim long felosip progrem bilong ol.

Misis Eno i tok long sios feloisip grup bilong ol, ol i save yusim foskwea progrem long givim ol stia na mekim ol wok.

Dispela foaskwea progrem i karamapim divosen, edukesen, rekriesen na sevis.

“Divosen i karamapim ol eria olsem ol spirituel progrem na Baibel stadi.

“Aninit long edukesen, mipela i save kisim skul long ol kain skil, kisim awenes long helt, HIV na kalsa.

“Long rekriesen, mipela i lainim ol spot na tu, long wiving (weaving) skils.

“Long sevis, mipela i save visitim o go lukim ol skul, ol sik manmeri na pikinini long haus sik, long haus kalabus, ol ples we ol disebol lain i stap long en olsem Cheshire Disabiliti hom na Spesel Edukesen Senta,” Misis Eno i tok.

Em i tok taim ol i go long luklukim ol siklain, ol i save karim ol kaikai, ol prut, ol sop, toilet pepa na ol klos.

Misis Eno i tok sios felosip grup bilong ol i bin selebretim 20 yia bilong en long las yia. Dispela i bihain ol i bin bruk long Elevala na Gabi Yunaitet Sios.

“Kaunim wantaim ol yia we ol i bin stap yet aninit long Elevala na Gabi grup, bai mipela i stap long 40 yia nau,” Misis Eno i tok.

Ol felosip grup i bruk long tupela de na karimaut ol progrem bilong ol.

Progrem bilong ol Nait grup i save kamap long nait long ol Mande, taim progrem bilong ol de grup i save kamap long Trinde san taim.

“Long olgeta yia, sampela yangpela meri i kam insait long felosip grup na mi amamas long lukim dispela i kamap.

“M na ol arapela mama i kisim gutpela helpim stret long dispela sios felosip grup.

“Long spirituel sait, em i helpim mi long luksave long husat em Jisas long laip bilong mi.

“Mipela i kisim skul long wokim skrin printing, somap, kuk, bek na taim ol nupela na yangpela i kam insait, mipela i save skulim ol tu,” Misis Eno i tok.

Em i tok wantaim grup, ol i bin wokim wanpela gutwil wokabout i go long Sidni, Australia, ol narapela provins long PNG, na ol Sentrel kostel o nambis eria.

Mebu Asples Krai long Kalsa grup strongim yut long lotu

James G. Kila i raitim

WANPELA Kristen yut ministri bilong Mebu peris bilong Evangelikel Luteran Sios bilong PNG (ELC-PNG) long Raikos distrik, Madang provins i kamap wantaim gutpela rot long stiaim ol yut o ol yangpela manmeri i senisim pasin na holim strong tok bilong God long laip bilong ol.

Dispela grup em ol i kolim ol yet Mebu Asples Krai in Kalsa (MSCC) na ol i save autim tok long God yusim drama, danis, singsing na musik.

Mebu peris em i stap insait long Biliau seket bilong ELC-PNG long Raikos distrik.

I no long taim i go pinis, MSCC i bin lusim ples bilong ol long maunten long Mebu na i bin go soim drama na musik na danis bilong ol long Tugyak elementeri skul long nupela eria bilong Dumbal long

Raikos distrik.

Ol memba bilong Mebu Asples Krai in Kalsa i gat 9-pela meri na 13-pela man husat i go soim drama na autim tok bilong Papa God wantaim musik na singsing long Tugyak elementeri skul putim tumbuna bilas na kala i kamap nais.

Musik bilong ol tu i go swit tru bikos ol i yusim ol instramen olsem kundu, mambu flut na tu pen paip na olgeta samting we God Papa i blesim long kamap i kam orait tasol long samsam bilong ol long Dumbal.

Siaman bilong Mebu Asples Krai in Kalsa grup, Sunea Baguga i tok as tingting bilong ol yutsbilong Mebu long kamapim grup em long senisim pasin bilong ol yangpela manmeri, husat tude i save go insait long pasin bilong simuk mariwana, dring hombru na ol kain pasin no gut we i no gutpela long laip na sindaun bilong ol long bihain taim.


Baguga i tok ol yangpela manmeri tude i nidim Krai long stap long namel long laip bilong ol. Taim dispela i kamap, bihain taim bilong ol taim ol i marit na kamapim famili bai gutpela.

Em i tok grup bilong em, MSCC, i soim namba wan drama bilong ol autait long asples bilong ol long soim ol yet long ol autsait lain.

Ol i laik ol ausait komyniti i mas save olsem i gat kain sios yut grup i stap long wokim ol drama na danis long autim Gutnius bilong Krai.

Baguga i tok wanem peris o ogenaisesin i laikim ol lain bilong MSCC long go mekim ol drama, danis na singsing long autim gutnius bilong Papa God, em ol i ken salim tok long ol bikos ol i redi tasol na stap.

Seketeri bilong Tugyak Luteran Kongresen, Leffy Ovosa i amamas tru long kain nupela pasin insait long ol Kristen yut.



Lent

WELKAM gen long 2015 long bungim bikpela pestode bilong Kristen yia na em i stat pinis long Es Trinde.

Insait long dispela Lent, em i taim bilong yumi redi long bikpela Paska Misteri bilong dai na kirap bek bilong Jisas.

Olsem na insait long Lent, em i taim long sekim laip bilong yumi.

Sapos yumi abrusim laip, taim wok mani na famili bilong yumi, em nau Len em i gutpela taim long glasim na rausim ol dispela ol wit no gut na traime long abrusim birua.

Tru, planti taim yumi save abrusim bodi, tingting na spirituel laip bilong yumi.

Tasol nau, em i taim we Jisas i askim yumi long poroman wantaim em long ples drai long bungim ol traime.

Long las wik Sande rit i kam long Santu Mak 1:9-15, yumi bin harim Jisas i kisim laip givim Baptismo wantaim Holi Spirit.

Em i soim yumi olsem Jisas bai kamapim nupela pipel bilong God na God i bin odenim na mekim Jisas i luksave em yet namel ol sin manmeri.

Dispela odinesen em bilong ministri i go long pipel bilong God long dispela wol.

Bikpela wokabout bilong Jisas stat long Joden em bai pinis long Golgota.

Namel long wokabout, Satan i traime long bagarapim wok bilong God.

Dispela wol em fil bilong pait namel long God na Satan, gut na no gut na ministri bilong Jisas i kisim i go insait long hat bilong dispela pait.

Yumi Kristen tu i wokabout wantaim Jisas na i stap long dispela fil bilong pait.

Yumi mas sanap strong na abrusim dispela tentesin na yumi i mas win.

Jisas em i no tok yesa na givim Satan sans, nogat!

Em i tok no na winim dispela pait. Yumi tu mas tok no na winim Satan.

Progrem i save helpim ol yangpela meri

ANINIT long foaskwea progrem, ol Wimen’s Felosip grup memba i save helpim tu ol yangpela meri i stap long hevi na tu, long stiaim ol long gutpela rot, Boni Eno bilong Lakani Toi Memorial Sios meri felosip grup memba i tok.

Long tude, planti yangpela meri na ol liklik meri krismas bilong ol i no bikpela i wok long pati pati na dring, raun nabaut long ol klap na kisim bel.

“Planti yangpela meri i dring raun na ol i no tingim sios.

“Tasol wantaim dispela foaskwea progrem, mipela i lukim sampela senis i wok long kamap.

“Yangepla meri na i no marit i kisim bel i wanpela hevi, tasol sampela i wok long kam bek long sios na tanim i go long Bikpela i helpim ol bihain long ol i karim bebi. Sampela narapela i no wari na ol i go het long mekim ol bikhet pasin.

“Mipela i traime hat long kisim ol dispela yangpela pikinini meri na ol i senis na bihainim gutpela pasin. Sampela i orait, tasol sampela i skruim laip long pati-pati na dring.

“Long sait bilong HIVna AIDS, mipela i givim aut ol skul awenes long ol mama tu long helpim ol pikinini meri bilong ol. Na long stopim ol long go aut long ol pati na dring raun na kisim sik HIV na AIDS,” Misis Eno i tok.



KOMENTRI

Yumi painim yet rot bilong stopim ol hevi i kamap long kar

Olgeta de long wanpela hap bilong kantri, bai i gat ripot bilong kar i bam o i kapsait na ol pipel i dai. Dispela em i no nupela samting. Long taim ol pipel bilong PNG i kisim laisens bilong draivim kar na i holim stia bilong kar, dispela bagarap i save kamap oltaim.

Tude i gat moa kar long ol rot long olgeta kona bilong kantri. I gat moa man na meri i kisim laisens bilong draivim ol klas wan i go inap long klas bilong draivim ol bikpela masin samting. I gat ol draiva husat i kisim laisens long stretpela rot, na i gat ol draiva husat i sotkat long kisim laisens. Ating ol i go putim K50 aninit long tebol o baim lans o katen bia na ol i kisim laisens.

Em stori bilong ol rot na kar na

ol birua i save kamap oltaim long kantri bilong yumi. Tru i gat ol lo i stap long bosim ran bilong kar na i gat lo i stap long wanem kain kar i ken ran long rot. Na tu, i gat lo i stap long stretim ol bagarap i kamap long ol rot olsem bai kar i ken ran gut. Tasol husat tru i mekim wok bilong lukim sapos ol dispela lo i wok gut? Em i wok bilong nesanel gavman o ol provinsal gavman.

Ol opisa bilong Len Transpot i save hatwok tru long mekim awenes long sefti bilong ol kar na ol pasindia husat i ran long kar na ol sain i stap long rot long tok save long ol draiva. Olgeta yia long taim bilong Nesanel Rot Sefti Wik, ol wokman i save mekim bikpela awenes tru long tok save long ol pipel. Tasol i luk olsem toktok i save go insait

long wanpela yau na i kamaut long narapela na i go lus nating.

Long kain ples olsem Mosbi, i gat ol kauboi draiva i pulap. Kain stail bilong ol long draiv i save hatim bel bilong planti manmeri. Ol i no wari long laip bilong narapela draiva na ol narapela manmeri husat i wokabaut long rot. Nau planti kar moa i pulap long siti na olgeta de i gat ripot bilong kar i bam o i kilim o bamim man. Watpo bai yumi larim ol dispela kain bikheth draiva i baim liklik mani tasol long kot na ol i go fri.

I mas gat strongpela mekim save long ol draiva husat i kamapim eksiden we man i dai. Sapos draiva i spak na draivim kar long dispela taim, orait i mas gat bikpela moa mekim save. Spitim kar na spak pasin em tupela samting i save kamapim

moa birua long ol rot long PNG long olgeta yia. Dispela hevi i wok long kamap bikpela moa bikos nau i gat moa kar long ol rot na moa draiva tu.

Tude i gat ol rot blok i save kamap long sekap long laisens bilong draiva na kondisen bilong ol kar. Sapos i no gat laisens o kar i no rejista bai ol opisa i kotim draiva. Em tasol. I no gat rot bilong putim nem na rejistresen bilong draiva long kompiuta na ol polis o Len Trensport i ken sekap sapos dispela kar i kamapim eksiden bipo. Ol han bilong gavman husat i lukautim ran bilong ol kar na laisens bilong draiva i no gat wanpela gutpela netwok long strongim wok bilong ol. Long ol arapela kantri long wol, i gat rekot bilong ol draiva na kar i stap long kompi-

uta na i isi long ol polis o arapela opisa bilong gavman i ken painim.

Opis bilong Moto Vihekel Rejistresen i gat lista bilong em tasol i no gat wok bung wantaim ol polis long sekap long kar na husat i papa long en. I luk olsem i no gat netwok tu namel long bikpela opis long Mosbi na ol provins. Tude we i gat kompiuta na planti ol savelain bilong yusim kompiuta na kamapim program i pulap long PNG, yumi no ketsap yet long dispela pasin bilong wok bung namel long han bilong gavman long stopim ol hevi bilong lo na oda. I gat taim yet long stretim ol dispela samting na strongim wok bilong lukautim sefti bilong ol pablik long ol kar na rot long PNG, na sevim laip bilong pipel.

Hevi long rot na bikheth draiva i bikpela long Madang



Polis opisa bilong AFP i sanap skelim hevi long Modilon rot taim dispela bas i bam na pundaun long baret.

WANPELA polis opisa bilong Australia i sakim het bilong em na i no bilip stret olsem no gat wanpela lain i kisim bagarap long las wik Fonde taim wanpela bas i bam na pundaun i go daun long baret arere long Kuperu stret long Modilon rot long Madang taun.

Dispela eria em bisi ples tasol long dispela taim i bin laki tru olsem no gat lain i wokabaut o sanap long hap taim bas na wantaim narapela trak i bam na trak i sakim dispela PMV bas i go daun long baret.

Dispela polis opisa bilong Australia husat i wanpela long Australia Federal Polis (AFP) i bin go wantaim ol trafik polis long Madang. Dispela bas we i bungim hevi i save ran long Trens-Gogol rot i go olsem long Mawan na go daun.

Bas ya i pundaun slip krangki stret long las wik Fonde apinun taim wanpela daina trak i bamim sait bilong en i go daun long baret arere long Gospel Laithaus hostel long Madang.

Dispela birua i kamap long Modilon rot long Madang taun, em wanpela main rot tasol i go insait long taun we nau i wok long lukim planti hevi. Ol kar i pulap na longpela lain na tu planti pot-hol na ol krosing i mekim ol kar i save kamapim longpela lain stret. Long moning taim stat long samting olsem seven klok i go 9 klok trafik save pulap tru stap long haus sik i go olgeta long Handy Mart Maunten.

Hevi bilong ol draiva dring na draiv na no save tingim sefti bilong ol manmeri i wokabaut nau i wok long go bikpela insait long Madang taun.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Ol nupela wok kamap insait long Mosbi na Sentrel Provins long poto



↑ **KLOSTU PINIS:** Taurama Senta bai klostu pinis nau long redi long Pasifik Gems.



↑ **TOKTOK LONG OL NIUSLAIN:** PM wantaim Sports na Ivens Minista Justin Tkatchenko na Gavana bilong NCD Powes Parkop i toktok long ol nius manmeri insait long Taurama Senta.



↑ **NUPELA MASIN BILONG SAMAP:** Ol Mosbi Saut meri bai kisim skul long samap insait long Koki maket. Memba bilong Justin Tkatchenko i givim nupela masin long taim ol i bin opim Koki Maket.

↓ **NUPELA RAIS FAM:** Nupela rais fam long Gabadi.



↑ **SEKIM RAIS FAM:** Ol NAQIA wok manmeri i sekim rais fam long Gabadi long Sentral Provins.



Pacific Dawn turis sip kirapim bek turisim long Madang



Bikpela turis sip, *Pacific Dawn*, i kam sua long bris long Madang.

Ol Poto: James G. Kila

James G. Kila i raitim

OL MANMERI long Madang na tu, ol ples klostu i guria na amamas tru long lukim wangepa bikpela turis sip tru i go sua long Madang na kapsaitim ol turis manmeri bilong ovasis long lukim Madang.

Tru tumas, long Fonde, Februeri 19, spirit bilong turisim long Madang i kirapim bek long matmat, taim bikpela turis sip ol i kolim *Pacific Dawn* i go sua long bris long Madang taun wantaim long long 2,500 turis manmeri olgeta.

Dispela traipela mama bilong turis sip em antap moa yet olsem 8-pela stori haus na bikpela bilong en i mekim ol bilding arere long bris long Madang i liklik stret.

Ol manmeri long Madang i ken stap longwe na lukim antap bilong sip taim olsem i ran long bas long Modilon Draiv long Sir Donald Botanikel gaden. Sip ya em bikpela stret.

Insait long *Pacific Dawn*, ol i gat olgeta kain samting yu ken tingim long hotel na arapela samting moa tu. I gat haus sik, i gat planti rum bilong slip, i gat swimming pul na tu i gat ol ples bilong pilai antap olsem snuka, volibal na tu tenis na laibreri na ol ples bilong dring na kaikai.

Dispela raun bilong *Pacific Dawn* i go long Madang em bihain long longpela taim stret. Na go bilong dispela sip i kirapim stret lait olsem Madang i stap strong yet olsem wangepa turis ples we ol ovasis manmeri i ken go lukim na amamas long naispela

bilas bilong Madang na kalsa na pasin tumbuna bilong PNG.

Wangepa kampani husat i save go pas long promotim turisim indastri long PNG, Melanesian Turis Sevises (MTS) i redim naispela ol program bilong dispela wangepa de raun bilong ol turis husat i kam long bikpela sip *Pacific Dawn*.

MTS em kampani we pastaim rijinol memba bilong Madang, Sir Peter Barter em papa long en olsem menesing dairekta, na MTS i save promotim turisim indastri long planti yia nau.

Wangepa opisa bilong MTS, Wesley Anton i tok olsem dispela raun bilong *Pacific Dawn* i go long Madang em i kirapim bek kain ol visit o kam bilong ol bikpela krus sip long go sua long risot taun bilong Madang.

Mista Anton i tok olsem maski olsem dispela stop bilong *Pacific Dawn* em long wangepa de, tasol MTS i redim gutpela ol program long mekim ol turis i amamas long go bilong ol long Madang.

Em i tok gutpela samting long sait long Madang we ol arapela pot o bris we *Pacific Dawn* i ken go long en long PNG em olsem Madang i gat klostu olgeta lain kalsa grup bilong PNG we i makim olgeta rijon bilong kantri i stap. Na ol dispela lain kalsa grup bilong olgeta foapela rijon long kantri i sambai stret long soim kain kain ol kalsa na bilas bilong tumbuna long soim ol turis bilong ovasis.

MTS i redim wangepa liklik festival long eria bilong Madang Risot Hotel ol i kolim Sugeng Aben, we ol kalsa grup bilong

olgeta rijon bilong PNG i singsing na danis na soim kalsa na pasin tumbuna bilong ol long ol ovasis turis. Dispela eria i lukim ol lain Huli bilong Hela provins, Tapioca bilong Milen Be provins, Manus danis, Asaro graun-man, ol lain Simbu Ambai bilas, Niugini ailan danis na ol asples bilong Madang yet i samsam wantaim 'Singsing Kanai' Pudeng na ol arapela singsing wantaim makmak,

Ol turis bilong Australia na Nu Silan na sampela bilong America i amamas tru long lukim ol kain kain tumbuna bilas na danis na tu naispela kala bilong ol purpur na peint ol lain i putim na samsam long las wik Fonde.

Mista Anton i tokim *Wantok Niuspepa* olsem MTS i rin redim trupela program long go wantaim kam bilong ol turis long *Pacific Dawn*.

Wangepa long ol dispela program em ol turis i kalap long bas na raun wantaim ol turis long lukim ples insait long taun we ol i gat intres long lukim.

Ol ples we ol turis i raun i go lukim em Mildas Maket, Madang Haus Tumbuna Kalibobo Laithaus, na tu ol turis i bin raun i go long ol ples arere long taun long pilim na lukim stret 'Madang Ekspiriens'.

Mista Anton i tok narapela program we MTS i redim bilong ol turis em long haba krus, we ol turis i kalap long bikpela sip bilong MTS em Kalibobo Spirit na raun insait long Madang haba na lukim ol lokal ailan olsem Kranget, Siar na Bilia. Ol turis i gat sans tu long stop long 20-minit na waswas

na swim na kisim piksa long naispela Tabb Ailan, we i gat naispela waitpela wesana na naispela na klia solwara.

Infomesen dispela niusman i kisim long sip *Pacific Dawn* i stori olsem dispela krus sip em papa bilong em na lain i go pas long ronim em P&O Cruises Australia. Dispela sip *Pacific Dawn* em ol i wokim long 1991 long kantri Italy na kampani i wokim dispela sip em Finantieri sipad.

Infomesen i tok olsem namba wan nem ol i givim long dispela sip em Regal Princess na namba wan lain husat i odaim sip long baim em Sitmar Cruises, tasol ol i givim i go long em narapela kampani Princess Cruises. Bihain kampani ya i salim dispela sip i go long P&O Cruises Australia.

Bihain long P&O i kisim sip na ol i senisim nem Regal Princess i go *Pacific Dawn*, na ol redim sip gut stret na stretim olgeta samting ol putim em long wok, stat long Australia i go long ol Saut Pasifik ailan kantri. Dispela i namba wan sip bilong P&A em olgeta bodi bilong em i gat waitpela kala, we i holim strong kain pasin long 1930 bilong ol lain i bin statim P&O, em Peninsulana Oriental Stim Nevigesen Kampani.

Ol i senisim nem bilong sip long makim 75 krismas bilong P&O long Australia.

Planti manmeri long Madang i amamas long kisim poto long mobail fon na long kamera taim ol i go lukim dispela traipela mama bilong sip i sua long bris long Madang. Sampela lain i kalap long moto bot na dingi na go aut long kisim poto arere long dispela traipela mama bilong sip.



Wangepa mama i soim ol peinting long ol turis i lukim.



Ol turis i wokabaut long sekim ol henkraf maket arere long rot klostu long bris long Madang.

Stori bilong tumbuna



Kokonas i kam we?

Dispela em i stori bilong kokonas na rot i bin kamap pastaim tru long Papua.

Bipo tru long wanpela ples klostu long solwara, wanpela liklik meri i bin stap wantaim papa na mama bilong em.

Wanpela de dispela liklik meri i go long gaden na kisim sampela yam. Em i bringim ol yam long haus na mama bilong em i tokim em long go na kisim sampela wara.

Nau, dispela hulwara i stap longwe tru. Olsem taim liklik meri i go long kisim wara hia, mama bilong em i kukim olgeta yam bilong em na tupela wantaim papa i kaikai na pinisim olgeta.

Ol i tokim pikinini olsem, kandre bilong em i hangre na ol i givim pinis olgeta yam long em. Na tu ol i tok kandre hia i go pinis. Tupela i save mekim olsem, olgeta taim. Ol i save giaman em tasol.

Wanpela de, liklik meri hia i wari no gut na wok long krai i stap na i no moa harim tok bilong mamapapa bilong em moa.

Orait, ol i lusim em na ol kirap i go long gaden. Taim ol i go pinis, em i kirap kisim olgeta samting bilong em na putim long bilum. Bihain em ranawe i go long nambis na kalapim wanpela diwai.

Em i stap antap long diwai na tromoi ol samting i go daun long solwara. Wantu ol bikpela pis i kamap na katim katim ol samting hia. Orait bihain gen, em yet kalap i go daun na ol pis i katim katim em long solwara.

Taim mamapapa i kam bek long gaden, ol i wok long painim em i go go tasol ol i no bin painim em. Olsem ol i ting em i kilim pinis em yet long wanem, tupela i no save mekim gutpela pasin long em.

Tupela i stap, na wanpela de, mama bilong dispela liklik meri i go aut long painim pis long solwara. I no long taim, em i lukim wanpela samting i trip i kam klostu long em. Em kisim na i kalap no gut long lukim het bilong pikinini bilong em. Em i kisim i go long man bilong em na soim em. Tupela i go longtaim liklik na tupela karim i go na planim ausait.

Long narapela de, ol i kirap i go ausait, tupela i lukim wanpela nupela kain diwai i kamap i stap. Bihain ol i lukim dispela diwai i karim pikinini.

Tupela i kisim pikinini bilong dispela diwai na ol i tekewe skin bilong en.

Ol i lukim insait bilong en i strong olsem ol i brukim na ol i lukim blut i stap insait long en.

Orait tupela i putim sit bilong paia long en na ol i planim gen long graun.

Bihain liklik, ol i lukim em i kamap olsem diwai gen. Long dispela taim ol brukim pikinini bilong diwai hia, ol i no lukim blut na ol i traime kaikai.

Ol i traime na i swit moa. Olsem tasol yumi i ken save nau, tupela hia i bin pes manmeri long kaikai dispela pikinini bilong diwai na ol i kolim kokonas.

Raun wantaim Wantok kru ...

Bikpela sios bung bai kamap long blesim nikel main

JAMES G. KILA i raitim

WANPELA bikpela sios bung o kruseid bai kamap long maunten bilong Kurumbukari long Epril 27 i go Me 3 long Usino-Bundi distrik long Madang provins.

Dispela bikpela kruseid we bai lukim wanpela spesel dedikesen i kamap we ol papagraun bai putim Ramu nikel main i go long han bilong Papa God.

Dispela em wanpela spesel seremoni tru em wanpela ogenaesisin ol i kolim ol yet Kurumbukari Spiritual Developmen Faundesen (KSDF) i wok long stretim nau.

Siaman bilong KSDF, Pastor Michael Yori i tok olsem dispela bikpela sios bung o kruseid bai lukim olsem Kristen Sios long KBK eria olsem Katolik Sios, Luteran Sios, Foa Skwea, Asembli ov God (AOG), Nazarin na Soul Harvest Ministry i bung long mekim lotu na redim dedikesen na tenks giving.

Pastor Michael i tok bikpela as tingting bilong dispela kruseid em long bihainim lek-mak o propesi we wanpela lokal profet Enoch Takai i bin lukim long yia 2003 we i

tokaut olsem developmen bilong dispela nikel main long Kurumbukari em wanpela bikpela kampani bilong Esia bai developim.

"Wanem samting profet Enoch Takai i lukim long driman o i kamap tru na nau em ol Saina i kam developim nikel main long Kurumbukari," Pst, Michael i tok.

Em i tok olsem wok bilong ol sios long bung aninit long ambrela ogenaesisin em Kurumbukari Spiritual Developmen Faundesen i mekim planti gutpela wok long lukim ol Kristen Sios i wok bung long senisim sindaun bilong ol manmeri na yut.

Pastor Michael i tok long nau dispela taim we sampela lain sipsip o yut i go aut long harim tok bilong God na mekim kain kain pasin nogut em gutpela taim long kamapim bikpela kruseid olsem.

Em i tok KSDF bai nidim sampela sapat na tu toktok wantaim kampani Ramu NiCo (MCC) long redim ples we seremoni bilong dedikesen bai kamap long Fonde, Me 5.

Pastor Michael i salim invitesin long ol arapela Kristen sios long Usino-Bundi distrik tu long go lukim na stap long dispela seremoni.



Anslom Nakikus bai laitim Sports Inn

Regei son bilong PNG Anslom Nakikus bai kam laip long dispela wiken long Sports Inn long Mosbi.

Anslom, husat nem bilong em na singsing bilong em i save stap long tingting bilong ol manmeri, bikpela i go inap long ol liklik mangi.

Em bai mekim wanpela nait so tasol long Friade nait wantaim ol sampela narapela ben olsem Narox na Wayne Tefatu bilong X-Vibs.

Anslom, planti singsing bilong save gat mining bilong em olsem "MEMBA" wanpela nau i wok long pairap strong long ol redio stesen insait long kantri.

Sport Inn na Peveks Promosen i bringim Anslom na ol dispela ben kam long Mosbi na KB Stone Prodaksen bai lukim saun bilong ol.

Sports Inn em wanpela ples i save helpim ol PNG musik manmeri long lon-sim albam bilong ol na strongim PNG musik.



Anslom Nakikus na Wayne Tefatu i singsing long wanpela so long Mosbi.

Talinga i kamap we pastaim

Long nait, blakbokis i kam kaikai pikinini diwai arere long haus bilong em. I no blakbokis tru em i dewel i kam giaman long em olsem na meri i ting em blakbokis na i krosim em.

Na dewel i tokim em long kukim hap sospen long paia. Orait, dispela meri i kukim hap sospen long paia nau. Na blakbokis i tok hap i tan hap i no tan na meri i tok dewel bai i kaikai mi ya. Na blakbokis i kam insait long haus wantaim em na tupela i pait no gut tru.

Na dewel i kilim em kaikaim em wantaim nupela pikinini na em i putim bun bilong tupela long haus. Na susa bilong em i katim na i kisim i go tromoi long man bilong em i stap long singsing.

Em i tromoi i go antap long gras bilong em na em i ting wanem samting i pundaun long het bilong em. Na em i kisim na lukim, na i tok o meri bilong mi i nogut pinis. Moabeta mi mas go.

Orait, em i kisim susa na i go long ples. Em i go na i lukim meme bilong saksak na i subim susa aninit long meme bilong saksak. Na em i go long haus na lukim meri i no stap. Em i go bek na i laik kisim susa, tasol no gat, i kamap olsem Talinga.

Olsem na nau i gat talinga long meme bilong saksak taim ol meri i wasim saksak.

Magdaena N. Tango i raitim




Wanpela meri i karim nupela pikinini na i slip i stap long haus. Man bilong em i go wantaim ol sampela pipel long singsing long wanpela ples.

TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG o email edres : editorial@wantok.com.pg Telepon namba: 3252500.* Tenkyu

Em nau! Ol pikinini i ken painim rot i go long ples wantaim Wantok kru...

Sudoku



7	9	6			8	
	6	5			9	
5	9	4			6	
			9	2	5	3
	5	7			1	9
9	2	7	1			
	6			8	9	5
7			3	2		
2		5	4		1	


9					6	2	
			2	6		1	
6	3	2				7	
	2	8		9		4	
		4		7	9		
	5		6		2	3	
	9				8	6	5
5				2	8		
4	1						3

Ansa bilong Sudoku # 83 na # 84 neks isu

5	2	4	9	1	3	6	8	7
1	9	8	6	7	5	4	2	3
7	3	6	8	4	2	5	9	1
9	1	5	7	2	8	3	6	4
3	6	7	5	9	4	2	1	8
4	8	2	1	3	6	9	7	5
2	5	9	4	8	7	1	3	6
6	7	1	3	5	9	8	4	2
8	4	3	2	6	1	7	5	9

1	5	8	7	9	2	3	6	4
2	3	4	6	1	5	9	8	7
9	6	7	4	3	8	2	5	1
4	2	3	9	8	7	5	1	6
7	9	1	5	2	6	4	3	8
5	8	6	1	4	3	7	9	2
8	1	5	3	7	4	6	2	9
6	4	9	2	5	1	8	7	3
3	7	2	8	6	9	1	4	5

Ansa bilong las wik Sudoku # 81 na # 82



Ol wod lista hia:

- PUKPUK MANGI WANBEL MAUS TERITORI
- LUSIM PLES TOBAKO MAK SKWAT
- TESIM SAMAPIM PAMKIN KALAPIM HAMBAK
- HAN AGRIMAN PISIN TEPRIKODA TOMATO
- MEDIKEL ROT SAMBAI MUSIM PAULIM

M A K R O L S L T E S I M P W E O C
 H K G J Y J D Y E C Z P E F E C A N
 X P I S I N K D R E D J D Q I O D Z
 V L F K A L A P I M P H I R O T E D
 F H F W F J H U T H B D K G D G S R
 T O B A K O X A O H E Y E V S M Z V
 U E D T H K Z Y R S A I L U S I M C
 O R P J A F U K I Z G M B X E T I P
 G J L R F S D T P E R E B R J O A L
 M S C N I I E I S B I Y E A H M N E
 H A N M E K L K G V M X B M K A I S
 T M O H K C O V K D A I M I E T N Z
 U A I Y R E C D M B N C N D E O K R
 S P I E F G K S A R N V X H N M U I
 X I O V S E A H T P U K P U K R S E
 P M A U S O M P S X N Z N H J S A L
 D F Y N C Y A M T A P T A X V B M Z
 S C H Y W A N B E L P E U L I M B R
 L S K X B E G L E D Y Z I R B A A W
 J F I R M F I M F K M C F O M R I P

Ansa bilong las wik Kroswod isu 2111



Mi gat wari na mi laikim helpim

Mi gat wari insait long famili na mi laikim helpim



Dia Laipain,
MI wokim paul pasin na slip wantaim tambu meri husat i maritim brata bilong mi.

Mitupela i gat bikpela laik long mipela yet.

Tambu bilong mi i tok man bilong em i no save givim em inap mani long baim ol klos na ol narapela samting moa.

Tasol mi tu i no inap long sapatim em bikos mi no gat wok.

Em i gat bel nau wantaim bebi bilong mi na em i laikim bai mitupela i ronawe i go long narapela provins. Mi wanbel long dispela.

Man bilong em, brata bilong mi, i no save long wanem samting i wok long kamap.

Olsem wanem, bai mi tokim brata bilong mi na famili bilong mipela o ronawe wantaim meri ya na bebi. Plis helpim mi!

WHAT CAN I DO?

Dia Pren

Tenkyu long serim wari na hevi bilong yu wantaim mipela.

Mipela i bilip olsem yu luksave olsem yu stap long hevi na yu laikim helpim long traim stretim.

Pren, yu bihainim raitpela rot long stretim pasin i no stret bilong yu. Mipela i luksave long pilings bilong yu taim yu lukim samting i kamap na yu givim bel long tambu bilong yu.

Pren, i gat planti as tingting watpo kain samting olsem i kamap na yu yet i save watpo yu wokim kain samting wantaim meri bilong brata bilong yu.

Yu tok olsem tambu meri i tokim yu olsem brata bilong yu i no givim em sampela samting em i laikim. Na yu yet tu i no inap long givim em ol dispela samting.

I moabeta yu stap isi liklik na tingting olsem watpo na long wanem as yu go insait.

Ating yu ken askim yu yet tu sapos

yu helpim tambu bilong yu taim yu slip wantaim em. O yu bin inap long abrusim em na toktok long brata bilong yu long ol wari bilong meri bilong em.

Na yu yet? Meri ya i tok tru? Em i tru olsem brata bilong yu i no lukautim em gut long ol samting em i laikim long en?

Yu tokim mipela olsem em i laik ronawe wantaim yu i go long narapela provins.

Yu ken ronawe wantaim em tasol dispela inap long stretim hevi?

Yu luksave tu olsem pasin yu mekim wantaim tambu bilong yu bai bagarapim famili bilong yu? Yu no wok na bai yu lukautim em na bebi olsem wanem?

Narapela samting tu em, brata bilong yu i ken kisim yu i go long kot long slip wantaim marit meri na bai yu go long kalabus.

Laipain i agensim ol marit i bruk o long manmeri i wokim pasin nogut olsem paul wantaim marit man o meri o givim bel long narapela i marit pinis. Tasol mipela i save helpim pipel i luksave long ol hevi bilong ol na givim ol stia long wokim senis long gutpela bilong ol na ol lain i stap klostu long ol.

Pren, yu yet yu save long wanem kain em brata bilong yu.

Wanem samting bai kamap sapos brata bilong yu i painim aut long samting yu na meri bilong em i wokim?

I gat narapela lain long famili bilong yu husat i ken helpim yu wantaim hevi yu gat long en? O i gat wanpela sios pasto yu save long en husat yu ken lukim em long helpim yu?

I moabeta yu kisim helpim na stiatok long husat kain man olsem i ken helpim yu long kain hevi yu stap long en.

Mipela i luksave olsem em i bai hat, tasol yu mas sanap strong. Baibel i tok long Galesen 6:7, "No ken giamanim yu yet, no gat man i save pilapilai long God.

Wanem samting yu planim, em yu bai kisim kaikai bilong em".

Pren, sapos yu lukluk gut long dispela, bai yu kisim ol samting we yu yet i planim.

Samting yumi wokim long graun i gat ol pe bilong em. Moabeta yu stop liklik taim na tingting gut.

Pren, em i no leit tumas long senis. Moabeta yu bilip long God. Proverbs 3:5-6. Em i save wanem samting i wok long kamap na em i ken soim yu ol rot long helpim we yu ting olsem i no stap. Dispela em bikos em i kea o laikim yu tumas.

No gat man inap pogivim yumi, tasol God i ken. Ritim 1 John 1:9.

Em bai i no isi tasol yu kisim namba wan step long painim rot long stretim hevi na mipela i bilip olsem yu ken daunim.

Mipela i bilip olsem yu luksave pinis long samting yu mekim i no stret nakikbek bilong em tu. Long abrusim moa traim, i moabeta yu lusim brata bilong yu na meri bilong em na yu go stap wantaim sampela narapela hauslain bilong yupela taim yu painim rot long stretim hevi yu gat long en.

Moabeta tu yu kisim kaunseling long wanpela pasto o Laipain.

God i ken stiaim yu gut taim yu mekim ol disisen.

Pren bilong yu Laipain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori. Laipain

Tok Pilai wantaim Kanage



Naispela kuk i popaia...

KANAGE na misis bilong em i laik kukim brekfas kaikai long wanpela Sarere moning. Tasol long bikmoning, ol i go long maket na baim ol naispela bikpela mekpas kumu olsem bin, aibika, pamkin, tulip na kumu gras.

Feveret bilong Kanage em bin ya.

Ol pikinini na bubu bilong ol tu i kirap na pilai ausait, wetim brekfas kaikai. Tupela Kanage na misis i wok long kuk i stap long haus kuk.

"Gutpela meri bilong mi, ol naispela bin stret ya, bai yu kukim nau na yumi kaikai gut stret," Kanage i tokim misis bilong em.

"OK my wan, bai mi praim gut tru na yumi brekfas long en. Lukim, ol manki tu i pilai na wetim kaikai i stap. Mi mas hariap nau long praim wantaim nudels na tinpis," Misis Kanage i tok.

Kanage i go raun ausait. Em i lukim wanpela liklik ankel i kam long narapela ples wantaim sampela toktok long ol lain bilong em na tupela i stori i stap.

"My wan," Kanage i singaut long misis. "Taim kaika i kuk, skelim wanpela plet bilong kandere ya tu", Kanage i singaut long misis.

"No ken wari my wan, planti kaikai i stap," Misis i singaut bek.

Rais i tan pastaim pinis na nau, Misis Kanage i wok long praim bin i stap. Em i no putim yet abus na nudels na i laik putim sol nau.

Misis Kanage i go long hap kona long haus kuk we ol sol botol i stap long en. Tupela wankain botol i stap wantaim, na Misis Kanage i kisim wanpela tasol na kapsaitim sampela i go insaitlong prai pan wantaim bin i wok long boil na kuk gut stret.

Tasol smel bilong omo i strong na Misis Kanage i tingting planti olsem dispela smel i kam we?

Em i sekim botol sol we em i kapsaitim sampela i go pinis long prai pan bin, na em i lukim olsem em i asua pinis.

Ol i putim botol omo wantaim botol sol na samting i miks olsem na Misis Kanage i bagarapim naispela prai bin.

"Aiyoo mama! Bikpela asua ya" Misis Kanage i singaut. Kanage i kirap no gut long misis i singaut na em i ran i go na klostu em i sam antap long paia na kapsaitim prai pan.

"Wanem, wanem, gutpela meri bilong mi, kaikai i redi pinis o?" Kanage i askim.

"Mi asua pinis, bikos omo i go insait long prai pan i gat bin long en," Misis Kanage i tok na kapsaitim bin long prai pan na Kanage i no gat toktok, tasol em i ai op i stap bikos bai no gat gutpela bin brekfas na ol samting i go wara nating bek.

Ol skwat!

Salim ol gutpela Kanage tok pilai i kam long: Kanage Tok Pilai P.O. Box 1982, Boroko, NCD Port Moresby. Email: jwilson@wantok.com.pg

Ol Poto: Veronica Hatutasi

Poto bilong ol Poreporena Yunaitet Sios seket long Hanuabada viles long lonsing bilong 2015 Felosip program bilong ol. Lukim ol stori long Pes 12.



REDI: Sampela long ol Wimens Felosip mama grup i redi long go insait long lonsing program.

SOIM BENA: Tripela De taim felosip mama bilong Lakani Toi Memoriel Sios (LTMC) grup i holim bena bilong ol.

BIHAIN LONG LONSING: Trinde De taim felosip grup bihain long lonsing program lotu seremoni.

Ol raun nabaut poto

Ol Raun Nabaut Poto



Kava bilong Pentecost long Vanuatu i redi long go long maket. Poto: ABC

Solomon Ailan i redi long taim bilong birua

OLGETA ejensi bilong gavman na NGO i bung long praktis trening we World Vision Solomon Ailan i ranim long redi gut long taim bilong birua i kamap. World Vision i wanpela long ol aid ajensi i givim bikpela helpim long taim bilong disasta long Solomon Ailan. World Vision Solomon Ailan na olgeta ejensi i save wok wantaim disasta rispons wok long kantri nau gat gutpela piksa moa wok bung long taim bilong disasta.

Dispela i kamap bihain long World Vision i bin wokim disasta simulesen ekasesais long Honiara we i karamapim olgeta disasta ejensi long kantri.

Simulesen Ekasesais Rispons Mesesa bilong World Vision Solomon Ailan, Ali Kiko i tok dispela ekasesais i soim sampela eria we olgeta ejensi i mas stretim long taim bilong disasta. Em i tok olgeta ejensi wantaim tu Nesanel Disasta Menesmen Opis nau gat bilip olsem wok bilong ol long dil wantaim ol disasta bai gutpela moa.

Choiseul Provins i laikim moa pawa

PRIMIA bilong Choiseul Provins long Solomon Ailan i tok provins bilong en i nidim moa pawa long sentral gavman na bai em i ken develop gut.

Primia Jackson Kiloe bilong Choiseul Provins i tok em i no isi long kamapim developmen long provins taim planti long ol pawa i stap yet long han bilong nesanel gavman.

Em i tok provins i no nidim ol opisa tasol long kam daun, em i nid long em yet i kontrolim ol hap bilong gavman em i nidim long developim provins.

Primia Kiloe i mekim dispela toktok taim Radio Australia i askim em long sait long developmen bihain Choiseul i makim namba 24 aniveseri bilong en olsem wanpela provins las wik.

WNB provins i yusim TV long ol skul

SAMTING olsem 176 praimer skul long Wes Nu Briten provins

nau bai yusim televisen long ol skul wok bilong ol.

Gavana bilong provins Sasindran Muthuwel i mekim dispela toktok bihain long em i bin opim dispela program ol i kolim EQUITY long Kimbe.

Gavman bilong PNG wantaim helpim i kam long JICA, wanpela NGO grup bilong Japan i lukautim na go pas long dispela program i go long olgeta hap bilong kantri.

Dispela program i bin stat long Wes Nu Briten provins long dispela wik.

Gavana Muthuwel i tok tu olsem dispela program bai helpim tu ol papamama na ol narapela pipel long ol rural eria long save long wanem samting i save kamap long nius long ol narapla hap bilong PNG na tu long wol.

Australia i no helpim Pasifik long kava bisnis

AUSTRALIA i no helpim ol pipel bilong Pasifik ailan long kain pasin em i save egensim kava ol pipel long Pasifik i save dringim na ekspotim.

Dr Vincent Lebot, wanpela egrikalsa saientis bilong husat i wok wantaim Vanuatu egrikalsa dipatmen na i saveman bilong kava i mekim dispela toktok.

Dr Lebot i mekim dispela toktok bihain long wanpela kot long Jemani i givim disisen las wik olsem, em i wanbel long disisen bilong narapela kot long Jun, 2014.

Dispela Bundesinstitut für Arzneimittel und Medizinprodukte (BfArM or the German Federal Institute for Drugs and Medical Devices) nau i bin mekim dispela apil egensim Administrative Court bilong Cologne long 2014 .

Kot i bin rul olsem i no gat wanpela pruf long sait long saiens olsem kava i nogut samting long helt bilong pipel.

Dr Lebot i tok ol pipel long Pasifik i bin dringim kava long planti tausen yia na em i no bagarapim helt bilong ol.

Dr Lebot i tok dispela i gutpela nius long ol Pasifik kantri, tasol bikpela wok i stap long promotim kava we dispela keis long Jemani i bin bagarapim.

Tasol em i tok, kain pasin Australia gavman i mekim long egensim kava long kantri, i givim taim long ol i promotim kava long

salim i go long ol narapela rijon long wol.

Moa Solomon Ailan meri i wok bisnis

SAMPELA mama na ol yangpela meri blong Solomon Ailan nau i save lukim mani bihainim tingting bilong 20 meri husat i bin statim Solomon Ailan Wimen in Bisnis Asosiesen (SIWIBA) tenpela yia i go pinis.

Presiden bilong Solomon Ailan Wimen in Bisnis Asosiesen

Dalcy Tekulu, i bin mekim dispela toktok long taim ol i bin makim dispela tenpela yia blong ol long Honiara.

Em i tok as tingting bilong statim dispela grup em bilong helpim ol meri i mekim ol samting na statim ol liklik bisnis bilong ol long helpim ol yet na tu ol famili bilong ol.

Misis Tekulu i tok tu olsem ol i bin gat liklik namba tasol taim ol i bin stat, tasol nau ol i gat 300 ol memba.

Australia, aninit long AusAid program bilong en i bin helpim dispela grup na nau aninit long DFAT program em i go het long helpim

Ol kampani long PNG i wari

SAMPELA bisnis lain blong ol narapela kantri long Papua Niugini i wari na paul liklik long tingting bilong Minista bilong Tred.

Paul Barker eksekutiv dairekta bilong Institute of National Affairs long PNG mekim dispela tok.

Tupela wik i go pinis, Tred Minista Richard Maru i bin tokim Palamen olsem klostu em bai autim wanpela bikpela wok we gavman bai bihainim.

Mista Maru i bin tok, em bai mekim ol papa bilong ol liklik na namel sais bisnis, o SME husat i kam long narapela kantri i salim ol dispela bisnis bilong ol i go long ol PNG pipel.

Em i tok ol bisnis em ol i gat moni aninit long ten milien kina i mas salim ol dispela bisnis long ol pipel bilong PNG.

Mista Barker i tok dispela tingting bilong Minista Maru i wok long kamapim planti toktok nau long PNG long wanem i gat wari tu olsem sapos ol i pasim ol bisnis bilong ol, planti lokal pipal bai lusim wok bilong ol tu.



NUPELA TISIOT: Ol etlit i soim nupela Fun Run tisiot bilong dispela yia taim ol i lonsim long Gateway.



MIPELA BIKPELA PES YA: Ol meri bilong ol polis man long Gordons bareks i save amamas long wiken taim tas ragbi i save on long pilai graun bilong ol.



PLES BILONG SLIP: Ol yuni sumatin long Mosbi bai amamas long slip gut long dispela nupela Gems ples taim Pasifik Gems i pinis. Gavman bai givim long ol taim bikpela pilai i pinis long mun Julai long dispela yia.

Ol PNG pres kaikai fama i bungim hevi long wok bilong ol

PLANTI fama long kantri i save bungim planti hevi long bringim ol samting i go long ol maket.

Ol pres kaikai em ol i save planim tu long PNG Hailans rijon.

Paul Barker em Eksekutiv Dairekta bilong Institute of National Afeas (INA) i tok planti fama long PNG i save bungim planti hevi long bringim ol samting em ol i save planim i go long ol maket long kantri.

Sampela long ol displa hevi em, rot i bagarap, ol pipel i no gat ol haus i gat ol frisa we ol i ken putim ol kaikai bilong ol, na tu long Hailans rijon, ol pipel i save askim long kompensesen tumas.

Ol i bin lukluk long ol

dispela wari na ol gutpela rot ol i ken bihainim long bringim ol pres kaikai i go long maket long wanpela trening i bin kamap long Goroka, long Isten Hailans provins long wik i go pinis.

Hailans rijon i gat planti fama tru husat i planim planti gutpela kaikai we ol i ken salim long nambis, tasol ol dispela fama i no save kisim gutpela mani bikos long ol dispela hevi.

Ol lain bilong Institute bilong National Affairs i bin helpim long redim dispela wokso, na Mista Barker i tok ol pipel i planim ol gutpela kaikai, tasol ol dispela hevi i save bagarapim wok bilong ol.



Ol naispela pres kumu yu ken painim long Gerehu maket, Nesenel Kapitel Distrik



Dispela meri i salim ol pres mekpas lip pamkin long Gerehu maket

Ol Poto: Veronica Hatutasi

Mobail Ikwipmen woklain i lainim nupela teknoloji

OL WOKLAIN bilong Mobail Ikwipmen Mentenens seksen bilong Ramu NiCo long Basamuk Rifaineri i tokaut olsem ol i wok long lainim sampela nupela samting long wok eria bilong ol bihain long kampani i kirapim operesen bilong en long Raikos distrik long Madang.

Tim Lida bilong Mobail Ikwipmen Mentenens Seksen, Herman Kabul i tokaut olsem ol woklain i lainim ol nupela samting na ol

teknoloji olsem haidrolik sistem, naumetik sistem na ilektronik sistem long wok long ol nupela model hevi duti trak na ol masin we i wok wantaim ol nupela teknoloji.

Mista Kabul i tok Mobail Ikwipmen mentenens long Basamuk i gat tupela seksen em lojistiks na mentenens. I gat 20 nesenel wok lain, na lojistiks i save givim sapot sevis long lukim olsem ol samting bilong wok i stap redi long mekim wok olgeta taim.

Em i tok mentenens seksen i gat tupela eria we ol i save wok long en. Wanpela eria i save lukluk long fiksion ol lait kar na arapela seksen em long wok long ol hevi ikwipmen o masin olsem ol semi trak, hevi masin na ol treila.

Mista Kabul i tok long sait long hevi ikwipmen, i gat 11-pela nesenel wok lain i stap husat i save gat sans long lainim ol nupela teknologi long sait long wok na kisim ol save

stret long wok.

“Sampela taim mipela i save gat hevi long sait long komyunikesen o toktok i go kam wantaim ol lain wanwok bilong Saina. Tasol planti taim ol i save helpim mipela long sait long lainim ol nupela teknologi long sait long wok,” Mista Kabul.

Em i tokaut tu olsem planti long ol hevi trak na masin i save bungim hevi long sait long neumetik na haidrolik sistem hevi bikos ol i save wok long win na oil long sait long brek sistem na dispela i nidim spesel skills na teknologi long stretim.

“Planti taim hevi ol kar bilong mipela i save bungim em long sait long brek i no wok gut. Mipela i gat wanpela sistem we olgeta kar na trak bilong mipela i save kam long sevis bihain long ol i ran 500 aua, olsem na dispela i soim olsem mipela i gat gutpela sefti rekot,” Mista Kabul i tok.

Mista Kabul yet i stat wok wantaim MCC22, wanpela kontraka pastaim wantaim Ramu NiCo long taim projek i stap long konstraksen taim na em i wok long 2007 i go 2011, na bihain long sotpela taim malolo tasol, em i joinim Ramu NiCo na i wok long Basamuk Rifaineri Mobail Ikwipmen Mentenens seksen i kam inap nau.

Em i tok olsem em i lukim sampela gutpela senis i kamap we i lukim ol nesenel wok lain i lainim sampela wok na tu wok long nupela ol teknologi we bai i ken redim ol gut long muv i go wok long arapela kampani bihain long Ramu NiCo.

Mista Kabul i gat samting olsem 30 lokal lain husat i wok klostu wantaim em long sait long kompetensi best reining long sait long wok we i ken helpim ol long wok wantaim Ramu NiCo.

“Planti long ol dispela boi em ol bilong lokal viles tasol ol i soim save na wok bilong ol i orait bikos ol i joinim kampani bihain long Projek konstraksen, na nau mipela i mas trenim ol long ol wok na ol i ken kamapim gutpela saveman long wok wantaim hevi masin,” Mista Kabul i tok.



Ol wok lain long Mobail Ikwipmen Mentenens seksen long Basamuk wantaim tupela Saina wanwok bilong ol.

Longpela rot stap yet long komesel rais projek

Stanley Nondol i raitim

MINISTA bilong Tred, Komes na Indatsri, Richard Maru i tok gavman i amamas long pailot rais projek long Gabadi, Sentral provins. Tasol dispela projek i gat longpela rot i stap yet bipo long projek i ken kamap wanpela komesel rais projek long kantri.

Minista Maru i mekim dispela toktok long taim bilong namba wan haves bilong supa haibrid rais projek long Gabadi long dispela wik Mande.

Wanpela kampani ol i kolim Village Garden i traim pailot rais projek long Gabadi wantaim teknikel helpim bilong Filipins na long Mande dispela wik i lukim Village Garden i havestim namba wan kaikai bilong rais inap long 10,000 kilogram.

Minista Maru i tok dispela havest i no putim Village Garden long gutpela mak yet bikos I gat sampela samting moa i stap yet. Sampela samting Minista Maru i laikim Village Garden long soim em;

- Dispela pailot projek i mas soim olsem Supa Haibrid rais i ken gro moa long 2 na 3-pela sisen long Sentral provins pastaim long ol i ken kism i go long ol arapela

provins aninit long komesel SME projek.

- Ol saientis i mas testim graun long lukim sapos em i gat inap gris long rais i ken gro gut na tu sapos i gat ol binatang bilong bagarapim rais.
- Kos bilong prodaksen long wan wan hekta na prosesing na pekejing i mas kamap insait long 3-pela sisen bilong pailot projek. Na Village Garden i mas soim long pailot projek olsem em i ken planim inap rais long resis wantaim rais bilong ol ovasis kantri long prais bilong rais.

Minista Maru i tok em ol teknikel samting na projek divelopa i mas soim long gavman na ol pipel bilong kantri olsem em i fit long mekim dispela projek long PNG.

Long dispela wik Mande, Village Garden i havestim 10,000 kilogram long wanpela hekta. Tasol Minista Maru i tok longpela rot i stap yet na i no taim bilong paitim boros yet na tok rais projek i kamap gut.

Em i tok gavman i laikim kantri i planim rais bilong em yet. Tasol planti rais projek long planti hap i no kamap gut na kantri i no ken westim taim na mani long rais projek we bai no inap karim kaikai long ol yia bihain.



Rais projek long Gabadi, Sentral provins. Namba wan haves i kamap long dispela wik Mande.

NEC givim tok orait long rivais MoA bilong Tolukuma

Nesanel Eksekutiv Kaunsil (NEC) i givim tok orait long rivais memorandam ov Agrimen bilong Tolukuma Gol Main wantaim ol komitmen bilong gavman.

Praim Minista Peter O'Neill i bin tok rivi bilong Tolukuma Gol Main bai kamap bihain long olgeta 5-pela yia.

Tolukuma Gol Main i stap long Goilala distrik long Sentral provins. I no gat rot bilong kar i go kamap long hap na ol wokman i save go kam long helikopta tasol.

Dispela rivais MoA bilong Tolukuma Gol Main projek we nesanel gavman, Sentral Provinsal gavman, Waitape Lokal Level Gavman, Tolukuma Gol Main na Yulai Lendona Asosisen long 2007.

Dispela rivais MoA em i stat kamap long 2012 na i pinis long Desemba 2013 na olgeta stekholda long agrimen i tok orait long reit bilong royalti mani bai stap long 2 pesen.

Long wankain taim, Praim Minista Peter O'Neill

i tok kabinet i givim tok long Dipatmen bilong Pesanel Menesmen long kamapim Tolukuma Infrastraksa Developmen Komiti (IDC) na kamapim wanpela opis aninit long Sentral provinsal gavman long helpim ol wok projek.

Mista O'Neill long las wik i tok kabinet i bin lukluk long ol autstending komitmen bilong Nesanel gavman long wokim Tolukuma haiwe, we em i wanpela hap bilong Nesanel Biding na Rot Network Program na i givim tok orait long ol ejensi bilong gavman long putim mani long wok bai kamap kwiktaim.

Hap bilong dispela rivais MoA em i toktok long Bisnis Developmen Plen na tri yia wok na trening plen bilong kampani.

Mista O'Neill i tok kabinet i tok orait long ol projek aninit long agrimen na i tok nesanel gavman program bai putim mani long wok bai kamap long ol projek aninit long agrimen. Ol wok developmen bai kamap inap gol main long Tolukuma i pinis.

Tok lukaut go long wok politiks go insait long BPNG

Stanley Nondol i raitim

WANPELA Profesa bilong Australia Nesanel Yunivesiti (ANU) i tok hevi bilong ikonmik bilong PNG bai go bikpela moa sapos politiks i kamap na eksens reit bilong PNG i no kam daun.

Profesa bilong ikonmiks na Dairekta bilong Developmen Polisi Senta long ANU, Stephen Howes i bin mekim dispela toktok long wanpela repot i kamaut long Esia Pasifik Forum.

Profesa Howes i tok sapos wok politiks i go insait long wok bilong Benk bilong PNG na eksens reit i no kam daun, na sapos gavman i no katim daun ekspendisa, bai i gat moa hevi i kamap long ikonmi bilong PNG.

Praim Minista Peter O'Neill i bin tok save long palamen las wik olsem ol bisnis na pipel i no ken pret long foren karensi i sot.

Em i tok PNG i gat inap foren karensi long risev bilong BPNG long mani mak bilong \$US2.2 (K5.8 bilien).

Gavana bilong Sentral Benk, Loi Bakani i sapatim Mista O'Neill na em i tok kantri i no sot long foren risev tasol gavman i kontrolim.

Mista Bakani i bin tok em i wok bilong ol komesel benk long go putim saplai long ol brens bilong ol long ol kastoma bai yusim. Tasol em i dia liklik long ol komesel benk i mekim dispela wok bilong

putim ol foren karens kes long ol senta.

Praim Minista Peter O'Neill i tok ol bisnis na pipel i no ken pret long foren karensi i sot.

Em i tok i gat inap mani tasol gavman i no bin putim sampela kontrol na lukim ol komesel benk i save sasim bikpela fi long trensekse bilong foren karensi treading.

Tasol Profesa Howes i tok dispela ripot bilong PNG gavman i kontrolim foren eksens reit na mani hevi bilong kantri bai go het na go bikpela na kantri bai bungim hevi bilong mani.

Em i tok long medium tem intres reit bai go antap na prais bilong ol samting bai go anatap na PNG foren eksens risev bai go daun.

Em i tok BPNG i mas larim eksens reit kam daun. Em i tok moa olsem gavman i no ken yusim moa mani o katim daun ekspendisa.

Profesa Howes i tok PNG i gavman i bin yusim bikpela mani long las 2 o 3 pela yia long ol winmani i kam insait.

Em i tok em i isi long gavman i ken sevim ol dispela mani long bihain taim.

Profesa Howes i tok 2015 em bai wanpela hatpela yia bilong PNG na rot i op long kantri ken bungim bikpela hevi bilong no gat inap mani.

Em i tok moa olsem prais bilong oil long wol maket i pundaun na bai no inap go antap. Na politiks bilong kantri bai soim klia wanem rot PNG i go long en.

Westpac bot miting kamap long Lae

LONG namba wan taim long 105 yia histori bilong Westpac PNG Limited, ol i holim anuel bot miting bilong benk las wik long Lae, Morobe provins.

Ol bot memba bilong Westpac i bung long Lae International Hotel long dispela miting bilong ol. Na bihain long en Westpac i holim wanpela bung kaikai long belo na long apinun tu wantaim sampela klaien bilong en.

Menesing Dairekta bilong Westpac Geoff Toone i tok benk i lukluk long stretim ol sampela benking sevis long Lae na i tok em i amamas long holim bikpela bung long Lae we em i wanpela rijonal senta bilong bisnis.

Em i tok ol i go miting long Lae long plenim gut benking sevis long olgeta hap bilong kantri long ol manmeri i kism gutpela benking sevis bilong Westpac.

"Mipela i wokim namba tu brens long Lae, klostu long Lae maket na mipela i amamas long opim long Julai long dispela yia," Mista Toone i tok.

"Westpac em i namba wan benk long

kantri na mipela i laik tokim olgeta kastoma bilong benk olsem mipela bai go het long givim benking sevis long kantri na lukluk long helpim planti pipel husat i no save yusim benking sevis bai yusim sevis bilong Westpac.

"Mipela bai helpim ol pipel long yusim gutpela benking sevis na givim fri fainensel litresi program long helpim ol pipel i mas save long rot bilong sevim mani, baset na menesim gut mani long helpim ol yet na famili bilong ol."

"Mipela i gat wok long groim sevis bilong benk long kantri na bai sapatim ol komyunit long wok bilong ol long helpim gutpela sindaun bilong ol liklik manmeri," Mista Toone i tok.

Westpac i mekim bisnis long 7-pela Pasifik ailan kantri, Kuk Ailan, Fiji, PNG, Samoa, Solomon Ailan, Tonga na Vanuatu.

Long wankain taim, BSP benk na Westpac long dispela yia i sainim agrimen long BSP bai tekova long Westpac long ol 5-pela Pasifik Ailan kantri.



Wok i kamap yet long nupela Westpac brens long Lae siti.



GLASIM RAMU NICO PROJEK



Wanpela Ramu Nico, Wanpela Komuniti

Ramu NiCo givim fri wara saplai long ol Basamuk viles

RAMU NiCo Menesmen (MCC), divelopa bilong namba wan nikel/kobalt projek long Madang provins i lukluk moa long divelopim egrikalsa na ol arapela sasteinabel projek long ol viles insait long projek eria bilong en long bringim ap stendet bilong ol pipel.

Long soim olsem Kampani i gat luksave long ol agrikalsa wok, las wik tasol Presiden bilong Ramu NiCo, Wang Jicheng wantaim tupela Vais Presiden Wang Baowen wantaim Zha Weihang i wokabout wantaim ol wok lain bilong Komyuniti Afes Dipatmen bilong Ramu NiCo long lukim ol kakao gaden, ol kaikai na kumu gaden na ol pig na kakaruk fam long ples arere long Basamuk long Raikos distrik long Madang.

Presiden Wang i luksave olsem wara em bikpela samting tru long helpim agrikalsa divelopmen long Basamuk eria, tasol ol wok painimaut i soim olsem planti ol famas long Basamuk eria i sot long wara saplain long sapotim wok bilong ol. Planti long ol i nogat gutpela wara-paip, ol pam na tu ol arapela samting long joinim wara.

I no long taim i go pinis, Ramu NiCo Komyuniti Afes Suprintendent long Basamuk, Jacky Wang wantaim ol CA opisa husat i wok klost wantaim Sosel Ekenomik Divelopmen Progrem (SEDP) olsem James Liu na Tony Gayu i askim menesmen na kisim bikpela ol wok wantaim long kirapim wara saplai aninit long Stratejik Agrikalsa Divelopmen Skim.

Mista Jacky Wang i tokaut tu olsem CA Dipatmen long Basamuk Rifaineri i yusim mani long baim ol samting long program bilong en long stretim gen wara saplai.

Insait long dispela wok ol i karimaut wok meintenens o wok stretim long ol wara saplai na surikim ol tep-wara i go long ol fam long ol ples long Mindre na i go olsem long Haba.

Mista Jacky Wang i tok wok bilong rausim ol olupela paip we i bagarap na ol tep na ol joints em hatpela wok na wok ya kontrak i bin go long Raibus Enjiniaring Limited long wokim na ol i kamapim wok pinis. Raibus Enjiniaring em wanpela Ramu NiCo papa-graun kampani.

Nau yet askim i go long ol lokal komyuniti

long lukautim gut dispela ol wara saplai i go long eria bilong ol na noken bagarapim.

Em i tok long ol yia pastaim, i bin gat ol bagarap i kamap bikos sampela lain i bikhet na i no lukautim gut saplai na bagarapim na dispela i givim hevi long komyuniti. Dispela i mas stop na olgeta lain i mas soim rispekt na was gut long projek we bai i ken helpim olgeta manmeri na pikinini long komyuniti tete na bihain taim tu.

Mista Jacky Wang i tok moa long 1,500 manmeri long ol lokal viles arere long Basamuk Rifaineri olsem Ganglau, Sulu, Duman, Haba, Jangag, Bobidik na Mindre nau i ken kisim gutpela klinpela wara saplai i kam long Ramu NiCo.

Em i tok dispela wara ekstensen program bilong Ramu NiCo i helpim 6-pela pig fam, 2-pela kakaruk fam na 24 kakao famas na 26-pela lain husat i gat ol gaden kaikai na i nidim wara saplai. Dispela program bai go het long 2015.

Ramu NiCo Menesmen (MCC) long 2009 na 2010 i bin givim moa long US\$ 350,000 long kamapim sampela ol bikpela SEDP projek.

Sampela long ol SEDP projek we Ramu NiCo i wokim i kamap orait na i helpim ol manmeri na komyuniti insait long projek impekt eria.

Kampani i save bihainim ol wok aninit long Memorandum ov agrimen (MOA) long sapotim na kamapim ol projek we i ken helpim gutpela sindaun bilong ol komyuniti em i wok klostu wantaim.

Ramu NiCo i bin bungim sampela ol salens tu long wok em i wokim aninit long SEDP bikos i gat planti lain i stap long givim salens na nogat wanbel tingting na wok i no go orait tumas.

Tasol bikpela samting em Ramu NiCo i sanap strong long MOA we i sainim na tu laik bringim kamap gutpela wok bung namel long kampani, gavman na lokal stekholdas long ol SEDP projek.

Sampela ol gutpela wok kamap nau i stap long sait long egrikalsa divelopmen we i kamap long Basamuk na KBK eria na tu long Inlen Paip plain long sait long kakao na tu ol trening long kisim sids na groim ol gaden kaikai.



Presiden bilong Ramu NiCo, Wang Jicheng i givim wara long ol kapis long gaden long Tugyak viles



Ramu NiCo Givim Fri Wara Saplai long ol Basamuk Viles



Ramu NiCo na CCRI i wok bung wantem long kirapim wok kakao long ol Projek impekt eria



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paip plain)

'Wanpela Ramu NiCo, Wanpela Komyuniti'



SIME DARBY Plantesisin i baim NBPOL

Veronica Hatutasi i raitim

DISPELA wik Mande i bin lukim bikipela welpam plantesisin long PNG i go long han bilong bikipela plantesisin kampani long kantri Malesia.

Insait long wanpela bung long Mosbi, Sime Darby Plantesisin SDn Bhd (SDP) em han bilong Sime Darby Bhd we i gat nem long wol long kamapim setifaid sastenebol welpam long wol, i bin pinisim ol wok long baim aut Nu Briten Welpam kampani (NBPOL) i stap long Wes Nu Briten provins.

NBPOL i bikipela welpam kampani long PNG na em i save kamapim bikipela mani i kam insait. Em i gat nem tu long plantesisin na welpam wol. Harrissons & Crosfield (H&C) i bin statim NBPOL kampani long ol yia long 1970.

Na H&C i bin stap insait long wok bilong tupela kampani i bung wantaim na kamapim Sime we i kamap nambawan long kamapim setifaid sastenebol welpam long wol.

Bosman bilong Strateji na Bisnis Dvelopmen long Sime Darby Plantesisin, Dokta Shariman Alwani long seremoni bilong pinisim ol wok long baim aut NBPOL, i tok nau tupela kampani i bung wantaim na dispela bai mekim ol i sanap long gutpela mak na wok bung wantaim long strongim kampani i gro na bihain taim bilong kampani.

Kampani bai no inap senisim nem na em bai stap olsem NBPOL.

Dokta Alwani i tok SDP i strongim wok long tripela eria olsem maketing, edukesen na risets.

Ol i stap long 16 kantri long wol na nau, PNG na Solomon Ailan em tupela kantri long Pasifik rijon i stap insait.

Strongpela beis na ol mil bilong ol i stap long hetkota, Malesia, Indonesia na Laiberia long Afrika.

Na SDP i save kamapim 26 pesen welpam long wol.

Tan Sri Mohd Barke Salleh em Presiden bilong SD Berhad na em i tok wok bilong bungim wantaim na nau pinisim ol wok long baim NBPOL i bin kamap gutpela tasol, we i no gat hevi.

Na tupela bai wok bung wantaim long gutpela bilong ol na PNG.

Em i tok SD bai bihainim ol makro polisi bilong PNG gavman long strongim moa na kamapim gut NBPOL.

Em i tok koneksen bilong SD wantaim H&C i kamapim dispela wok bung wantaim.

H&C i bin stap long PNG longpela taim na i gat gutpela wok pren wantaim ol provins na gavman.

Em i tok tu olsem weda peten o taim bilong san na ren em wanpela samting we i save kamapim gutpela na nogut long ol bisnis long dispela kantri na welpam bisnis i wanpela long ol.

Long wankain taim, Sif Eksekutiv Opisa bilong NBPO, Nick Thompson, i tok wok bilong ol em long kamapim ol bikipela wok long ol rurel eria, na i no fokas tasol long ekstraktiv bisnis.

Em i tok NBPOL bai kamapim gutpela na bikipela samting, tasol welpam bisnis long dispela taim nau i stap long "cross roads" bikos long ol wok na bikipela toktok long lukautim envairomen na ol kampani i mas gat ol pemit na tok orait i kam pastaim long ol papagraun na gavman bilong kantri.



SIME BAIM NBPOL: Tan Sri Mohd Barke Salleh em Presiden bilong SD Berhad na Sif Eksekutiv Opisa bilong NBPO, Nick Thompson i toktok wantaim ol nius manmeri long Pot Mosbi. *Poto: Veronica Hatutasi*

Pis i helpim tru wanpela mama Hula

...Baim wanpela kar long pis maket mani

PIS i ken helpim long kamapim gut laip na sindaun bilong man, olsem wanpela Hula mama long Sentral Provins.

Gutpela smail i ken kamap long yangpela mama Leila Ragekamu bilong Hula, Sentral Provins bikos long tude, maketim pis long liklik maket long 5 Mail, Henao Draiv, Pot Mosbi i mekim em i gat mani long lukautim em yet na famili bilong em.

Sapos yu draiv o wokabaut i go long Henao Draiv 5 Mail maket long Gordons, Pot Mosbi long ol wikde namel long 3 na 6 klok apinun, bai yu lukim Leila i salim pis long dispela maket i stap.

Em i gat ol kain kain kastoma bilong em olsem ol asples PNG lain na tu, ol waitman na ol Esia lain.

Olsem na pis bisnis bilong em i kamap gutpela moa.

Long Leila, salim pis em rot we em i save kisim mani long en na insait long las 8-pela yia, dispela i helpim em long baim skul fi long ol pikinini bilong em, baim bas fe na lans bilong ol, mekim ol kastom wok na antap long dispela, em i baim wanpela kar bilong em pinis.

Em yet i no save go painim pis, nogat.

Em i save go baim pis olsem ret empera, ol tauka na ol narapela moa

pis long Koki Maket, na kisim i go salim long 5 Mail maket.

Misis Ragekamo i tok em i no save kisim nating nating ol pis, nogat.

Em i lukim ol pis we ol kastoma i laikim na em i baim na salim.

Dispela samting i mekim pis maket bilong em i kamap gut moa, na moa pipel i save go long en.

Prais em i salim pis long en i stap namel long K25 i go inap K30 long wanpela mekpas bilong 6-pela fres pis.

Ragekamo i bilip olsem painim pis na salim i gutpela bisnis we i ken helpim man na meri bikos i gat planti pis long solwara, na ol i no inap pinis.

Fiul prais go daun na ol motobot amamas

PRAIS bilong ol fiul prodak long kantri i go daun na dispela i gutpela nius long ol konsumo o lain husat i save yusim fiul.

Long Madang provins, ol papa bilong ol dingi husat i save ran i go long ol ples olsem Karkar Ailan, Bagabag, Long ailan na Manam Ailan i amamas bikos ol bai baim fiul long liklik mani nau.

Long Madang taun, planti papa bilong ol motobot i wok long bringim ol dingi bilong ol long kisim fiul long taun na baim ol bikipela dram na kontena long storim ol jum long yusim.

Ol riteil lain bilong salim jum na petrol long Madang taun nau i pulap stret long ol dingi o moto bot i kam long Raikos, Karkar, Long Ailan na tu, ol arapela ples klostu.

Wanpela papa bilong motobot long Karkar, Wait Garas i tok em i amamas nau bikos em i ken wokim planti ran i go kam long kisim pasindia long Kubugam na bringim ol i go long Biabi bikos prais bilong jum i go daun.

Ol manmeri long ples husat i save yusim ol jenereta tu i amamas bikos prais bilong jum i go daun.



← NAIS NA NAIS OLGETA!

Tru tumas, yumi ken lukim ol naispela kain pis tasol we planti lain i save laik laikaim i pulap kapsait long hia em Ragekamo i salim i stap long Henao Draiv 5 Mail maket. Kam long apinun, ol dispela pis i save pinis olgeta.

→ FIUL PRAIS GO DAUN:

Ol moto dingi i lain long kisim jum na petrol long Rookes Marin long Madang taun bikos fiul prais i go daun. *Poto: James G. Kila*



Faivpela PNG etlit resis long Amerika

FAIVPELA PNG etlit i go long Albuquerque, kapitel bilong Nu Mexico long dispela wik long stap insait long Nesenel Juniar Kolis Indo Trek na Fil Sempionsip.

John Rivian na Theo Piniua bai makim Sautwes Komyuniti Kolis long 60m resis na 400m wantaim.

Rivan i stap long gutpela fom taim em i kamap long taim 6.84sec.

Dispela i soim olsem em i redi long salens bihain long em i bin kisim hamstring o bagarap long lek long Rijinol Sempionsip tupela wik i go pinis.

Piniua i wok long kisim fitnes isi isi na i pinis long taim 49.00sec las yia long Indo Sempionsip long New York.

Rellie Kaputin bai resis long kalap long Fraide apinun na bihain go insait long sempionsip we i luk olsem em i kamap namba tri insait long kantri long Junior Kolij Kompetisen bihain long em kalap long rekot 5.79m tupela wik i go pinis.

Em bai go insait long Tripel na Hai Jam long Sarere na bai stap long namba 4 na 10.

Adrine Monagi bai resis long faiv iven pentathlon we i lukim em i stap namba tu long kantri. Na Kalama Towarap bai ran long disten medli riley bilong Northern Iowa Eria Komyuniti kolis.

I gat 20 Kolis long Amerika i redi long stap insait long dispela Sempionsip.

Trukai Fan Ran bai statim 2015 Gems

Nicky Bernard i raitim

TRUKAI Fan ran bai kamap gen long dispela yia bihain long ol i lonsim long las wik. Dispela wan de amamas bai kamp long Julai 5 wanpela de bihain tasol long opening bilong Pasifik Gems.

Dispela yia bai namba 16 yia Trukai i sapotim PNG Olimpik Komiti long kamapim mani long salim tim PNG long go pilai long Komonwel na Pasifik Gems.

Dispela yia tu i makim 32 yia bilong dispela Fun Ran long kamap long PNG bi-

hain long PNG Ogenaising Komiti i bin kamapim tingting long mani long salim Tim PNG.

Dispela yia Trukai i kamapim 100,000 T/Sot na bai givim go i long PNGOC long oksenim long wanwan binis haus long logo bilong ol long kamapim mani bilong dispela yia Pasifik Gems long Pot Mosbi, na Komonwel Yut Gems long Apia.

Oksen bai kamap long Lae long Mas 21 na long Pot Mosbi long Mas 19.

Dispela yia tu bai makim 45 yia bilong Trukai long stap insait long kantri.



Spot na Ivens Minista Justin Tkatchenko, long lonsin bilong Trukai Fan Ran

Trukai kamap jesi sponsa bilong Hunters

SP PNG Hunters i kisim narapela sponsa gen i kam long Trukai Industri long sapotim ol long dispela yia resis long Intrust Super Cup salens.

SP Hunters i bin mekim gut tru long las yia long namba wan taim bilong ol long go pilai long Intrust Supa Kap.

Dispela i mekim na planti bisnis haus i wok long kam insait long helpim SP PNG Hunter long go insait long namba tu yia bilong ol long dispela kompetisen o pilai resis.

Trukai Industri i sponsaim jesi bilong ol Hunter long karim nem bilong Trukai, na dispela nau bai lukim jesi bilong Hunters bai i gat logo bilong ol tu bai stap long en

olsem ol narapela kampani na binis husat i bin sponsa long jesi bilong Hunters.

Trukai Industri i save sponsa long planti spot, olsem weiltlifting, ragbi yunien, austriga kanu na bikpela long en em fan ran we olgeta mani ol i kisim save i go long ol spot manmeri, na tim bilong yumi PNG long go pilai long narapela hap.

Dispela yia, Trukai i kamap wanpela sponsa bilong Hunters long wanem, ol i gat gutpela nem na ol pilaia save kisim gutpela displin long taim bilong trening, na taim ol go aut long pilai long pilai graun.

SP PNG Hunter i lonsim 2015 pilai bilong ol long Sande las wik na bai redi long namba wan pilai bilong ol long Brisbane.

Gordons tas lukim fainal

Nicky Bernard i raitim

DISPELA wiken bai Gordons polis bareks pilai graun bai lait olsem laitning na pairap olsem tanda taim ol tim i stap long fainal bai traum long kisim ples long gren fainal neks wiken.

Tupela olpela tim long kompetisen KB Eels na Bala Raiders A gret i kisim malolo long las wik na dispela wiken bai lukim salensim narapela tupela olpela tim gen.

Bala bai pilai wantaim Panthers na KB Eels bai kisim Erima Maggies long lukim husat tupela tim bai bung long gren fainal pilai long neks wiken.

Bala Raiders na Panthers i gat ol nupela yangpela mangi i stap insait long tim na tupela tim wantaim i gat wankain pilai. Ol spit man bilong ol bai winim gem bilong ol.

KB Eels i gat ol lapun lain bilong Gordons tas i stap long tim, kain lain olsem David Mune, Gay Lapi, James Tore na Kepo Livcha bai traum long toktok long ol yangpela mangi long mekim wok long winim pilai.

Erima Maggie i gat sampela lapun stap insait long tim na sapos ol mekim tred mak bi-

long ol long tromoi bal go kam bai lukim ol winim gem. Maggies na Eels i gat wankain sapota na ol dispela sapota bai sanap long tou pinga long dispela wiken long lukim tim bilong ol go tru long gren fainal neks wiken.

Gordon tas ragbi i bin stat long 1980s na ol dispela ol tim pilai long dispela kompetisen olsem Lapwing Tigers, Sharks, Bala, Eels, Eagles na Maggies ol bin kirapim olsem komyuniti spot long bungim ol wantaim. Nau em sampela nupela tim kam insait na mekim dispela kompetisen go strong.

Planti pilaia long dispela Gordons tas i mekim nem long sampela bikpela spot. Olsem Steven Mune, David Mune, James Tore, Tuksi Karu,

Stanley Aru na sampela moa. Sampela bilong ol yangpela polisman tu i mekim nem long dispela tas kompetisen.

Long dispela resis sampela sponsa i kam insait long sapotim tasol Wantok Niuspepa i no kisim nem bilong ol.

Olgeta yia taim kompetisen stat, Gordons na Erima save pulap long pilai graun bilong Gordon polis bareks long amamas na bungim ol nupela poroman.



B gret tim bilong KB Eels husat i redi long fainal dispela wiken



Brad Tete i sanap wantaim nupela Trukai Fan Ran Tisiot i toktok wantaim Sports na Pasifik Gems Minista Justin Tkatchenko long taim ol i lonsim Fan Run. Poto Nicky Bernard

Brett Morris bilong St George Illawarra i lusim ol na sainim 4-pela yia NRL dil wantaim Canterbury Bulldogs.



CANTERBURY Bulldogs i tokaut olsem Brett Morris em pilaia bilong Australia and New South Wales Origin i stap nau wantaim ol.

Brett Morris bilong St George Illawarra's bai joinim twin brata bilong em, Josh long 2014 NRL gren fainelis kem neks sisen bihain em i sainim 4-pela yia kontrek wantaim ol Bulldogs.

Inglan i lus krangi bihain Sri Lanka i winim em long Wellington

EION Morgan bai amamas long lusim Wellington bikos i no 10-pela de tu na Inglan i lus namba tu taim .



Trent Merrin i sainim tripela yia dil wantaim Penrith Panthers na bai stat wantaim ol long 2015 NRL sisen.



FOWED bilong ol Dragons, Trent Merrin, bai joinim ol the Penrith Panthers bihain long 2015 sisen, i sainim tripela yia kontrol wantaim klap.

Merrin, husat i bin pilaim namba wan pilai bilong em gut stret long St George Illawarra tim egensim Panthers long yia 2009, i sainim \$750,000 long wanpela yia agrimen.

“Trent em i wanpela gutpela futbol pilaia stret na em bai kisim bikpela na gutpela ekspiensi kam long skwat bilong mipela, na tu, dispela bai opim rot long ol yangpela fowod bilong mipela i kam insait long,” sif eksekutiv bilong Penrith, Justin Pascoe i tok long klap stemen.

Kriket Wol Kap

Brendon McCullum i bet long Nu Silan egens long Australia.

MCCULLUM bilong Nu Silan i paitim bal i go aut long Pool A 2015 Kriket Wol Kap pilai resis namel long Nu Silan na Australia long Eden Park long Auckland long Febueri 28, 2015.



Oi Black Caps i selebret taim Boult i autim Marsh

TRENT Boult bilong Nu Silan i selebret bihain em i rausim wiket long Mitch Marsh bilong Australia long ICC Kriket Wol Kap pilai long Eden Park long February 28, 2015 long Auckland, Nu Silan.

BSP i opim Skul Kriket Program long 2015

Esther Bralyn Wani i raitim

Benk Saut Pasifik (BSP) Kriket Program i opim spots developmen program bilong ol liklik pikinini long Jun Veli Praimeri Skul long Pot Mosbi. Dispela program i save kamap long olgeta praimer skul long Papua Niugini.

BSP i sponsa long dispela program na Kriket PNG (CPNG) i lukautim. Bikpela tingting bilong ol em long go aut long 15,000 pikinini long dispela yia. CPNG bai kisim 4,500 sumatin husat bai stap insait long BSP Skul Kriket Blast we em i wan de soft-bol kriket kompetisen namel long ol skul yet. Dispela em bilong ol skul i rejista tasol. Developmen Menesa bilong Kriket PNG

Gem, Gayan Loku, i tokaut long opisel opening bilong 2015 sisen bilong BSP Skul Kriket Program long Jun Veli Praimeri long Pot Mosbi.

“Mipela bai go pas yet long Junia Spot Kriket Developmen program long kantri na long rison (EAP) tu.

Mipela i save olsem mipela bai gat gutpela yia insait long BSP Kriket Program,” Mista Loku i tok.

Deputi Jenerel Menesa Bisnis Developmen bilong BSP, Kili Tambua,

i tok dispela program i no go aut bilong kisim ol pikinini long pilai tasol, em bai lainim ol pikinini long stap ektiv, na helti laipstail na givim ol gutpela pasin olsem rispek na wok bung wantaim.

Madang FC soim moa stail egens Hekari

JAMES G. KILA i raitim

PLANTI ol soka sapota husat i go lukim bikpela Nesenel Soka Lig (NSL) pilai las Sarere long Laiwaden oval long Madang taun i ken tokaut stret olsem Madang Futbol Klab i soim moa klas na stail bilong soka we i winim stail bilong biknem soka tim, Hekari Yunaited.

Maski olsem Hekari Yunaited i winim gem 2-1, planti lain long ol bus, nambis na ailan bilong Madang husat i go lukim dispela gem bai tok stret olsem ol stail ‘bilak bokis’ bilong Madang i pilai stail moa long ol biknem tim ya Hekari.

Wanpela strongpela soka sapota long Madang, George Martin, husat i save makim Madang pastaim long soka i tok olsem gem bilong ol Madang FC i moa smat na winim tru Hekari, tasol gem ya em referi na lains men i paul na givim opsait gol na Hekari win.

Em i tok maski Hekari Yunaited i gat planti ol ovasis pilai bilong Solomon Ailan long tim na arapela ol i kisim long ol arapela senta, Madang i soim stret olsem ol asples mangi i stail moa yet long soka na klostu autim ol Hekari.

Dispela bikpela gem long Madang i lukim ol lain sapota long Provins i kam long olgeta

kona bilong Madang na pulumapim stret Laiwaden oval stat long 12-kilok i go inap gem i stat long 3-kilok. Maski no gat ol arapela gem stat pastaim long bikpela gem, ol manmeri i sindaun tasol na wet long bikpela gem i stat long 3-kilok.

Martin i tok Madang i soim stail long passim bal na ran na kalap na hetim bal na kontrolim gem bilong ol gut tru long namba wan hap.

Long namba wan hap Madang FC i soim strongpela pilai stret wantaim ol midfil lain olsem Alwin Komolong, husat i pilai smat tru wantaim kepten Max Sengum.

Dispela gutpela kontrol bilong futbol i strongim ol i go inap wanpela gutpela bal i pundaun long rait wing, Vanya Malagian long pusim bal i go long straika Samuel Kini long pairapim umben bilong Hekari. Dispela gol em i naispela gol stret we i mekim olgeta sapota bilong Madang i singaut antap stret na sampela lain i ran i go insait long fil long soim amamas bilong ol na karim ol pilai. Em wanpela narapela amamas tru i kamap.

Martin i tok tupela gol bilong ol Hekari em lains man na referi i paul na givim nating, tasol ol mangi bilak bokis i no wari. Ol i ken kambek long winim ol arapela gem bilong ol na long bihain taim autim stret Hekari.



OPIM BSP KRIKET PROGRAM: Ol pikinini long June Veli Praimeri skul long Nesenel Kapitel Distrik i amamas long lonsim bilong BSP skul kriket program. *Poto: Esther Wani*

Moa toktok long Tim PNG long redi na makim tim

Olsem 4-pela mun bipo long XV Pasifik Gem i kamap long Pot Mosbi, Tim PNG i redi long pinisim ol tim bai makim kantri long pilai long hia.

Dispela i bikpela amamas long salens insait long asples na husat i stap insait long fainel tim bai gat sans long pilai.

Em bai wanpela bikpela salens namel long ol bikpela tim bai kam long salensim PNG olsem Nu Kaledonia, Tahiti na Fiji.

Long wankain taim, ol PNG skwat i redi long Pasifik Gem wantaim gutpela wok go het i kamap long trening bilong ol. Man i go pas long dispela tim em Chef De Mision, Richard Kassman.

“Tasol mipela i save olsem PNG Olimpik Komiti (PNGOC) i amamas long joinim 15 Pasifik Gem long Pot Mosbi.

Mipela i amamas long sapot bilong gavman na wok bilong VIEC na GOC long mekim redi ol samting,” Mista Kassman i tok.

Gavman i bin sapotim trening program wantaim fanding long Go For Gold. Long dispela ol i bin gat ol kompetisen long PNG na ovasis.

Ol bai tok aut long ol fainel tim taim Jastifikesen Komiti (JC) i tok orait long pinis bilong dispela mun.

JC bai kisim ol fainel lista na ol bai tok save long ol spot long disisen long dispela mun. Bihainim dispela, ol spot i mas sekim gen wantaim PNGOC long ol fainel tim bilong ol long Epril 27. Dispela bai givim 2-pela mun long ol fainel tim long redi bipo long Gem.

Mista Kassman i tok long redi long kain bikpela gem, em i bikpela wok tru na ol i save olsem Nesenel Federesen, na ol pablik bai helpim ol etlit long salensim Pasifik.

Em i askim PNG long sapotim ol etlit long wanem ol bai winim ol medol.

Volantia Program i kisim 5,500 eplikesen

VOLANTIA Program bilong BSP Wantok Tim i kisim gutpela bekim i kam long ol manmeri long 2015 Pasifik Gems bihain ol i lonsim long Februari 17.

Ol i kisim pinis moa long 5,500 apliken i go insait long program.

GOC Sif Eksekutiv Menesa bilong Opresen, Clint Flood, i tok, “Bekim i kam long ol manmeri i gutpela tru na mipela i save olsem bai mipela i wok bung wantaim gut tu long helpim ol pilai i kamap gutpela.”

Ol i wok long glasim ol apliken i stap na putim ol long sot lista, bihain long tupela mun, ol bai wokim seleksen.

Dispela bai lukluk long sait bilong intaviu na bihain makim ol husat lain inap tru long mekim ol dispela wok ol i givim long en.

Toksave long ol risal bilong dispela bai kamap long tupela mun i kam.

“Em i wanpela longpela rot long wanem, ol i laik skelim gut ol pipel husat bai makim

kantri olsem “BSP Wantok Tim” na tu, sapos ol i raitpela lain, mipela bai gutpela gem,” Mista Flood i tok.

“Aplikesen i pas pinis long Sarere, Februari 28 2015 na mipela i askim ol apliken long givim mipela taim long lukluk gut long ol dispela wok bilong seleksen wok, Mista Flood i tok.

Bihain long ol i tokaut long ol manmeri we ol i kisim ol, bai gat ol trening na ivaluesen ol bai karimaut insait long mun Me na Jun.

Dispela bai i soim olsem BSP Wantok Tim i redi long gem bai kamap long Julai. GOC CEO Peter Stewart i tok tenkyu long ol manmeri husat i kam sain ap long givim sevis bilong ol olsem Volantia.

“Dispela em i no wok bilong kisim mani tasol, no gat. Ekspiriens yu kisim olsem wanpela volantia i bikpela tru na mipela i amamas long intres ol pipel i soim long helpim mipela long bringim gutpela gems,” Mista Stewart i tok.



Ol Madang FC pilaia kisim ol skul toktok long ol senia bilong ol olsem biknem ol pilaia bipo em PNG straika bipo, Dickson Laviong, Amos Romo, trena Michael Steven na menesa na pawa straika bipo bilong Buresong na Mopi long Lae, Tweedy Malagian. Poto: James G. Kila

Ol wiken spot long poto

Ol poto: Nicky Bernard



BESTA RAUSIM BAL: Beks bilong Besta FC i rausim bal taim straika bilong Pom FC i ran i kam long em. Pom FC i win 3-0.



BILONG MI: Gol Kipa bilong Besta i kalap na kisim wanpela bal taim ol pilai bilong em i putim was long mak long stopim Pom FC long putim gol.



GORDONS TAS RAGBI: Steven Jambura bilong KB i ran wantaim bal taim pilaia bilong Panter's i tasim em long tas ragbi pilai bilong long Gordon. Semi fainal pilai bilong Gordons bai stat long dispela wiken.



BAI YU GO WE: Jerry Katusele bilong Knights i tasim pilai bilong Magpies taim em laik ronawe long A gret tas pilai long Gordons.

TOKSAVE: Salim ol spots dro bilong yu kam long Feks; 325 2579, e-mel; sporwol@wantok.com.pg o kam lusim long Wantok Niuspepa opis long Able Building Complex long Central Waigani, NCD.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



**Emi tuna
bilong PNG**



Manufactured by:



KD Tuna Canners Ltd.

Moa mit na
oil insait



TUNA IN OIL

PNG Spots Faundesen i givim 2006 - 2013 fainensel ripot



Spots Minista Justin Tkatchenko na Peter Tsiamalili Jr i givim ripot bilong PNG Spot Faundesen i go long opis bilong Odita Jeneral.

PNG Spots Faundesen i givim ripot bilong 2006 -2013 fainensel stetmen i go long opis bilong Odita Jeneral long dispela wik. Dispela ripot i soim ples klia olsem planti taim ol i no bin bihainim stret ol lo aninit long Fainensel Manesemen Ekt long lukautim gut mani bilong Faundesen.

Tasol CEO bilong PNG Spots Faundesen Peter Tsiamalili Jr i tok ol i bin luksave long ol hevi i bin stap pinis, na ol i stretim nau.

Em i tok Faundesen bai kisim K1.2 bilien infrastraksa bihain long Pasifik Gems long Julai, na dispela fainel ripot i soim olsem ol i karim nem bilong gavman long wok bilong spot olsem na ol i mas mekim stret wok bilong spots developmen long kantri.

Em i tok ol i mekim wok nau long stretim ol dispela asua i stap insait long ripot na kamapim gut wok bilong PNG Spot Faundesen.

Sampela hevi ol i painim long dispela 2006 - 2013 Fainensel Ripot em;

Non komplaiens long Pablik Fainens Manesemen Ekt (PFMA) na Pablik Sevis Jeneral Oda (PSGO);

I gat 23 Benk Akaun we olsem na i no gat rekot bilong sampela rot we mani i go.

Non-akwital long mani i kam long AusAID, inap long mak bilong K877,622.53, aninit long Sports for Development Initiatives (SFD), olsem na Faundesen i yusim mani bilong em yet long bekim olgeta dispela mani.

Oi i lusim K2milien long baim ol loya namel long 2012 na 2013.

Minista bilong Spots, Justin Tkatchenko i bin stap long taim Mista Tsiamalili Jr i givim dispela ripot. Em i tok tenkyu long wok Mista Tsiamalili i mekim long stretim ol dispela hevi. Em i tok nau i taim bilong lukluk i gohet na kamapim strongpela Faundesen long mekim wok bilong lukautim spots long kantri.

Featured Products

- *Treated Mosquito Nets Prevents Malaria
- * Visitect Tests for Malaria
- * Arterakine Tablets Treat Malaria (artemether & piperaquine phosphate)

Good Products, Better Prices, ikam long.



Johnstons Pharmacies Ltd

Phone 325 3185 Fax 325 0190 Email sales@johnstons.com.pg